



Igitabo gikubiyemo inkuru

Umwaka wa 3
w'amashuri abanza



A colorful illustration of a woman with orange hair tied back, wearing a yellow sleeveless top and green pants, sitting on a large tree trunk and reading a book to a group of children. The children are sitting on the ground in front of her, looking up at her. The background shows a blue sky, green trees, and a small stream. The word "Ewé" is repeated four times in a stylized font at the top of the page.

Igitabo gikubiyemo inkuru

Umwaka wa 3
w'amashuri abanza

Abanditse iki gitabo

Mary Sugrue
Ikiriza Hope
Niyitegeka Dative
Uwiragiye Chantal
Ndandali Didace

Abajyanama

Dr. Musabe Joyce
Bacumuwenda Nehemiah
Karera Stratton

Abashushanyije

Bizimana Seif
Munyurangabo Jean de Dieu
Banza Dolph

Abatunganyije iki gitabo

Twizeyimana Jean Pierre
Banza Dolph
Irihose Abdul Rahim

Abakosoye iki gitabo

Uzabakiriho Salvator
Kubwimana Fortunee

Itsinda rishinzwe kwemeza integanyanyigisho n'imfashanyigisho (TAC)

Dr. Musabe Joyce
Gasana Janvier
Rwambonera François
Dr. Habineza Faustin
Dr. Kayigema Jacques

Abandi bantu bagize uruhare mu kwemeza iyi mfashanyigisho

Hakizimana Alexandre
Ntambara Jean
Nshimiyimana Alexis

© 2014 Rwanda Education Board.

The Rwanda Education Board holds the copyright for the materials in this collection.

This publication is made possible by the support of the American people through the United States Agency for International Development (USAID). The contents are the responsibility of Education Development Center (EDC) and do not necessarily reflect the views of USAID or the United States Government.

Ijambo ry'ibenze

"Igitabo gikubiyemo inkuru" kigenewe umwarimu wigisha Ikinyarwanda mu mwaka wa gatatu w'amashuri abanza cyanditswe mu mwaka wa 2014 n'Ikigo Gishinzwe Guteza Imbere Uburezi mu Rwanda(REB), ku nkunga y'Ikigo cy'Amerika Gishinzwe Iterambere Mpuzamahanga (USAID) binyujjwe mu Mushinga Ushinzwe Guteza Imbere Uburezi(EDC/L3). Ni igitabo kije gufasha mu gushyira mu bikorwa gahunda yo guteza imbere umuco wo gusoma no kwandika mu cyiciro cya mbere cy'amashuri abanza kugira ngo abanyeshuri bawukurane kuko ari wo nkingi y'uburezi bufite ireme.

Iki gitabo cy'umwaka wa gatatu gikubiyemo imyandiko y'ingeri zitandukanye ifasha abanyeshuri kumva urugero rw'uburyo bakwiye gusoma basomerwa na mwarimu wabo cyangwa bakayikurikirana ku ndangururamajwi, maze na bo bakabyigana mu gihe basoma imyandiko ikubiye mu gitabo cyabo cyo gusoma buri munsi cyangwa basoma izindi nyandiko zose bahura na zo. Kizafasha umwarimu guha abanyeshuri urugero rw'uburyo bagomba gusoma. Imyandiko ikubiye muri iki gitabo, izabera umwarimu imfashanyigisho ituma abanyeshuri bunguka amagambo mashya kandi bakamenya indangamuco n'indangagaciro z'umuco nyarwanda. Gusomera abanyeshuri iyo myandiko bibatera ishyaka n'inyota yo kwisomera ubwabo ndetse no guhugukira ibyo biga. Abanyeshuri bazajya basomerwa iyi myandiko na mwarimu wabo, bongere banatege amatwi uburyo iyo myandiko isomwa ndangururamajwi. Kubera kandi ko abanyeshuri bo mu mwaka wa gatatu baba bamaze kumenya gusoma, umwarimu ashobora gusaba umunyeshuri umwe umwe, akaza imbere agasomera abandi, bityo buhoro buhoro, abanyeshuri na bo bakamenyera gusomera mu ruhame mu ijwi riranguruye kandi bashize amanga.

Mu gutegura iki gitabo, hashingiwe ku mahame y'iyigandero mu bijyanye n'imyigishirize ihamye yo gutoza abanyeshuri umuco wo gusoma bakiri bato. Gusomera umunyeshuri imyandiko ikubiye muri iki gitabo, bizamutera inyota n'ishyaka ryo gukurana umuco wo gusoma kandi akawusigasira mu buzima bwe bwose. Ni yo mpamvu mu gutegura iki gitabo hitabajwe impuguke zinyuranye mu by'uburezi ndetse n'imyigishirize y'indimi, cyane cyane ibijyanye no gusoma no kwandika, kugira ngo kinogere umwarimu kandi kigirire akamaro abanyeshuri.

Turashimira rero abantu bose bagize uruhare mu kwandika iki gitabo kuko bashyigikiye ku buryo bw'umwihariko igikorwa cyo gutoza abanyeshuri umuco wo gusoma no kwandika bakiri bato. Turasaba kandi abantu bose bazasoma n'abazakoresha iki gitabo gutanga ibitekerezo basanga byatuma kirushaho kunogera abo kigenewe.

Dr. John RUTAYISIRE

Umuyobozi Mukuru w'Ikigo Gishinzwe
Guteza Imbere Uburezi mu Rwanda (REB).

Ishakiro

Ijambo ry'ibenze	iii
Iriburiro.....	vii
Igihembe cya 1	ix
Abashyitsi batunguranye	1
Buri gikorwa kigira igihe cyacyo	13
Ubucuti bw'inyamaswa	27
Imbata yahindutse igishuhe	39
Semwishywa akunda gufasha abandi.....	49
Ubujjji bwa Nyiranshywa.....	61
Gaju ihura na Bihogo.....	71
Imbwa ya Semfwati.....	83
Igihembe cya 2	91
Incuti magara.....	93
Uko Mahoro yize ikinyabupfura.....	105
Uburenganzira n'inshingano by'abana.....	119
Nkunda igihugu cyanje	137
Ubutwari bwa Semana	153
Mutamu na Musheru	163
Ibuye ry'amayobera.....	177
Ifi n'inyoni	191



Igiembwe cya 3	213
Ubusambo bw'impysi Warupyisi.....	215
Uri mwiza Mama.....	237
Ngwino iwacu dutarame	249
Turi magirirane	259
Nzi kwandika ibaruwa	275
Imparage yandika umwirondoro wayo	287
Akanyamakuru k'ishuri	303
Umuugani wa Nyanshya na Baba.....	315
Ibitabo n'inyandiko byifashishijwe	329

Iriburiro

Abanyeshuri bageze mu mwaka wa gatatu w'icyiciro cya mbere cy'amashuri abanza, baba batangiye kumenya kwisomera bo ubwabo. Nyamara baba bagikeneye kumva urugero rw'umwarimu asoma mu ijwi riranguruye, adategwa, yubahiriza utwatuzo, ndetse anubahiriza injyana n'isesekaza bikwiranye n'ingeri y'umwandiko asoma. Urwo rugero rwo gusoma ni rwo abanyeshuri bazakurikiza bisomera bo ubwabo mu gitabo cyabo cyo gusoma buri munsi, basomera abandi mu ruhame, cyangwa basoma izindi nyandiko bahura na zo mu buzima bwabo.

Imyandiko yateguriwe abanyeshuri bo mu mwaka wa gatatu w'amashuri abanza iri mu ngeri zitandukanye z'ubuvanganzo nyarwanda zrimo: inkuru zishingiye ku nsanganyamatsiko zigaragaramo indagagaciro n'imico ikwiriye Abanyarwanda, imigani miremire, imigani y'imigenurano, imivugo, ikinamico, indirimbo, ndetse n'imyandiko izafasha abana gutangira kwandika bo ubwabo bamenyeshana amakuru hagati yabo cyangwa bayatangariza abandi.

Uko abanyeshuri basomerwa imyandiko iri mu ngeri zitandukanye, ni ko bagenda bunguka amagambo mashya, kandi bakitoza ubugen buranga buri ngeri. Ibyo bituma bamenya gukoresha ururimi mu mimaro yarwo yose: mu gusabana, mu gutanga amakuru, ndetse no mu kurukoresha bataka, cyangwa bagambiriye gushimisha abandi.

Iki gitabo gikoreshwa gute?

Mbere yo gusomera abanyeshuri

Umwarimu yereka abanyeshuri amashusho ari ku rupapuro ruriho umutwe w'umwandiko, akababaza ibibazo bikurikira: Ni iki mubona? Muratekereza ko umwandiko uza kuvuga ku ki? Kubera iki? Hanyuma akabasomera umutwe w'umwandiko.

Mu gihe cyo gusomera abanyeshuri

Umwarimu afata igitabo neza ku buryo abanyeshuri bose babona ibishushanyo, hanyuma akabasomera umwandiko wose agenda aberekam amashusho kugeza urangiye. Mu gihe umwarimu asomera abanyeshuri umwandiko, ni ngombwa gukoresha amarangamutima n'isesekaza bijyanye n'ibivugwa, ndetse akanubahiriza injyana bitewe n'ubwoko bw'umwandiko asoma.

Nyuma yo gusomera abanyeshuri

Umwarimu aha abanyeshuri umwanya wo gutekereza ku mwandiko. Ashobora kubabaza ibibazo rusange byo kumva umwandiko bibafasha kwibuka ibyo amaze kubasomera.

Kongera gusoma umwandiko

Umwarimu yongera gusomera abanyeshuri umwandiko bakavuga ku magambo akomeye cyangwa se akababaza amakuru mashya bakuyemo ndetse bakanagereranya ibivugwa mu mwandiko n'ubuzima bwabo busanzwe. Ibibazo bikurikira byafasha muri uyu mwitoto: ni nde wakunze kurusha abandi muri uyu mwandiko? Kubera iki? Ni ikihe gice cy'umwandiko wakunze kurusha ibindi? Kubera iki? Uratekereza ko byagenze bite nyuma y'uko umwandiko urangira? Kubera iki? Hari ibantu nk'ibi bivugwa mu mwandiko wigeze ubona cyangwa byakubayeho? Niba ari yego, byagenze bite?

Guha abanyeshuri umwanya wo gusubiramo ibyabaye mu mwandiko

Mu gusubiramo umwandiko umwarimu ashobora kwifashisha uburyo bukurikira: gushushanya ibyabaye, gusubiza ibibazo rusange byo kumva umwandiko, gukina ibivugwa mu mwandiko, kuvuga ibyabaye mu ntangiriro, rwagati no mu mpera y'umwandiko, cyangwa gusaba abanyeshuri gukora incamake yaho. Iyi myitozo ikorwa n'abanyeshuri mu masomo atandukanye ya buri cyumweru.

Ku buryo bw'umwihariko, imyandiko igenewe gufasha abanyeshuri kugira ubukeshamu mvugo nk'imivugo, indirimbondetsen'ikinamico, igombagufatwa mu mutwe maze buri munyeshuri agahabwa umwanya wo guseruka imbere y'abandi. Abarimu barashishikarizwa gusomera abanyeshuri iyi myandiko uko bikwiye kandi bagakoresha imyitozo ijyanye na yo. Ibi bizafasha cyane mu kwigisha abanyeshuri ururimi rw'ikinyarwanda, kubafasha gucengera ubugenii bwo mu rurimi no kwiyubakamo umuco n'indangagaciro nyarwanda.

Igihembe cya 1

Abashyitsi batunguranye




Kera habayeho inshishi zabaga mu nguni y'inzu nini yari iri mu mudugudu wa Rwinkwavu. Umunsi umwe, urushishi Nyanshya rwari **inkwakuzi** muri zo, rwa je rwishimye cyane rubaza izindi nshishi ruti "ese ntimwamenye ibyabaye? Muri uru rugo harategurwa umunsi mukuru. Mbonye baterura intebé n'ameza, boza amasahane menshi kandi banatetse ibiryo byinshi binyuranye."

Nyina w'izo nshishi arasubiza ati "ariko uzi ko ari byo! Dore mu gikoni huzuye inkwi nyinshi. Nta kabuza aba bantu bafite umunsi mukuru. Umenya bari buze kwita izina ka gahinja bacherutse kubyara."




Inshishi zose zumvise ayo magambo, zihita zegerana maze zitangira **kujujura**. Zari nyinshi pe! Urushishi rwari rukuru muri zo rurazibwira ruti “ahubwo nimuceceke! Nimureke dukore uko dushoboye ku buryo tuza kurya kuri biriya biryo. Ngaho nimutenge amatwi neza mbabwire uko tubigenza.”




Muri ako kanya inshishi zirekera aho kujujura maze zitega amatwi rwa rushishi rukuru. Nuko ruherako ruzigabagabanya imirimo. Rurazibwira ruti “mwebwe nshishi ntoya, muraza kwikorera utuvungukira tw’imigati. Mwe inshishi zimaze gukuraho gato, muraza kwikorera ibintu ibyo ari byo byose biryohereye. Hanyuma inshishi nkuru, zo ziraza kwikorera inyama.”

Inshishi zose zisubiriza icyarimwe ziti “ni byo.” Nuko rwa rushishi rwari rukuru muri zo rwungamo ruti “nshimye ko uwo mugambi muwemeye. Ngaho buri wese najye ku kazi ke kandi mumenye ko mugomba kwikorera inshuro nyinshi kugira ngo tuze kubona ifunguro rihagije.”


Nyuma y’ibyo, urushishi Nyanshya rurabaza ruti “none se nyogoku, mwe mushaje murakora iki?” Nuko rwa rushishi rwari rukuru kurusha izindi rurasubiza ruti “urabizi se, twe turumviriza tunarunguruke ibyo bariya bantu barimo bakora.” Rwongeraho ruti “nizere ko buri wese azi icyo agomba gukora!”




Inshishi zose zihita zinyanyagira zikurikira impumuro nziza y'ibinyobwa n'ibiribwa zumvaga. Hari harimo inyama z'inkwavyu, inshyushyu, imboga n'imbuto nyinshi zitandukanye. Izo nshishi zikomeza kugenda, zigeze ku rugi rw'igikoni zumva rwa rushishi rwari rukuru muri zose ruvuga rutu "nimuhagarare!" Hashize akanya rutu "ngaho nimukomeze nta kibazo."



Za nshishi zihita zinjira mu gikoni n'ubwira bwinshi. Nuko udushishi tw'utwana tuba twuriye ameza yari ariho umugati, maze dutangira kuwuvungagura no kwikorera utuvungukira twawo. Tutujyana mu mwobo, turongera turagaruka ari na ko turirimba tuti "ikorere umugati, ikorere umugati ... ikorere, ikorere, ikorere." Ibyo, utwo dushishi twabikoze inshuro nyinshi ari na ko dutekereza ku buryo tuza gukora umunsi mukuru dusangira utwo tuvungukira n'izindi nshishi.






Inshishi zikuze ho gato, zo zari zihugije ku isahane yari iriho imbuto zitandukanye. Hariho imyembe, inanasi, amacunga, imineke n'ibindi byinshi biryo hereye. Zirabirumagura, zikataguramo uduce duto duto.

Nuko zikajya ziji yana utwo duce mu mwobo wazo, zikongera zikagaruka ari na ko ziririmba ziti "ikorere imbuto, ikorere imbuto ... ikorere, ikorere, ikorere." Ibyo, izo nshishi zabikoze inshuro nyinshi ari na ko zitekereza ku buryo ziza gukora umunsi mukuru zisangira izo mbuto n'izindi nshishi.

Muri icyo gihe, inshishi nkuru zo zari zuriye igisorori cyarimo inyama z'inkwavy. Zirazirumagura, zirazishwanyaguza kugeza ziziciyemo uduce duto duto.

Nuko zikajya ziyyana utwo duce mu mwobo wazo, zikongera zikagaruka ari na ko ziririmba ziti "ikorere inyama, ikorere inyama ... ikorere, ikorere, ikorere." Ibyo, izo nshishi zabikoze inshuro nyinshi ari na ko zitekereza ku buryo ziza gukora umunsi mukuru zisangira izo nyama n'izindi nshishi.



Izo nshishi zahugiye muri ibyo ... zigiye kumva zumva rwa rushishi rukuru muri zo ruvuza induru rutu “ayiweee! Nimurekere aho, nimurekere aho! Ngabo baraje ngabo baraje!” Inshishi zose zahise **zishya ubwoba**.

Mu gihe zikibaza uko zibyifatamo, zumva **imirindi y'abantu** basa n'abambaye inkweto nini cyane baza bazisanga. Bagendaga bavuga batí “nimuzifate nimuzifate! Nimufate izo nshishi, nimufate izo nshishi!”

Rwa rushishi rukuru, ibyo byose rurabireba rwibaza uburyo rwakiza izo nshishi. Rurasakuza rutu “nimwiruke, nimwiruke! Nimwiruke cyane dore abantu babagezeho!” Nuko za nshishi zitangira **gukwira imishwaro**. Zimwe zisesera munsi y'akabati, izindi zica munsi y'urugi zirigendera.

Abishyize hamwe nta kibananira



Inyunguramagambo

Urushishi rw'inkwakuzi: urushishi rushabuka, rukora vuba

Kujujura: kuvuga buhoro cyane

Zishya uwwoba: zigira uwwoba, ziratinya

Imirindi y'abantu: urusaku rw'ibirenge by'abantu bagenda

Gukwira imishwaro: guhungira mu mpande zitandukanye.

Abishyize hamwe nta kibananira: lyo abantu bakoreye hamwe bagera kuri byinshi.

Ibibazo byo kumva umwandiko




1. Ni ba nde bavugwa muri iyi nkuru?
2. Inkuru yatangiye ite?
3. Inshishi zakoze iki nyuma yo kubona ko abantu bitegura umunsi mukuru?
4. Inshishi zigabanyije zite imirimbo?
5. Inkuru irangira ite?
6. Hari inshinshi, isazi n'utundi dusimba dukururwa n'umwanda ujya ubona aho uba cyangwa ku meza uriraho? Niba ari byo ni iki ugiye gukora kugira ngo tutongera kujya tuhaza?

Buri gikorwa kigira igihe cyacyo



Habayeho abavandimwe batatu, Kibanjwa,
Nyirantyoza na Ndyanabo. Bari batuye i Ntyazo.
Ndyanabo yakundaga kureba tereviziyo cyane.
Kibanjwa we yakundaga gukina cyane naho
Nyirantyoza we agakunda gusoma inkuru.
Ku munsi wa gatanu, Ndyanabo yarebye
tereviziyo kugeza mu gicuku.



Bukeye, Kibanjwa akangutse atangira gukangura Ndyanabo ati “kanguka! Byuka tujye gukina dore uyu munsi ntitujya ku ishuri.” Icyakora Ndyanabo yari agifite ibitotsi byinshi. Aramubwira ati “ndeka ndyame ndumva ninaniriwe.” Nuko arahindukira maze akomeza kwisinzirira. Ndyanabo yari ananiwe cyane kuko yari yaraye ijoro areba tereviziyo.




Kibanjwa ahita ajya kureba nyina. Maze aramubwira ati “mama, Ndyanabo yanze kubyuka. Arimo kugona ngo “hururururu, hururururu!”

Nyina aramusubiza ati “haracyari kare, ahubwo jya gukaraba mu maso, usokoze n’izo **njwiri** zawe, nurangiza unywe amata mu gihe ugitegereje ko abyuka.”

Icyakora Kibanjwa ntiyanyurwa. Maze abwira nyina ati “uzi impamvu se mama? Ndyanabo yabyutse nijoro ajya kureba tereviziyo bumukeraho.”

Nyina aramusubiza ati “mugomba kumenya ko buri gikorwa kigira igihe cyacyo.” Nuko yongeraho ati “ni byo koko mukeneye kureba tereviziyo kugira ngo mumenye ibibera hirya no hino. Ariko kandi mukeneye kujya mufata akanya mugakina kandi mukaruhuka. Genda wongere umubyutse.” Kibanjwa ahita asubira mu cyumba cyabo yiruka.





Nuko atangira gukangura Ndyanabo amubwira ati “kanguka ariko! Byuka tujye gukina dore uyu munsi ntitujya ku ishuri.” Ndyanabo yongera kumubwira ati “ndeka ndyame ndumva ninaniriwe.” Nuko yongera guhindukira maze akomeza kwisinzirira.

Kibanjwa aribaza ati “ariko se koko ubu **ndyumeho?**” Hashize akanya bimwanga mu nda, yiruka ajya kureba se. Aramubwira ati “papa, Ndyanabo yanze kubyuka. Arimo kugona ngo “hururururu, hururururu!”

Se aramubwira ati “ngaho jya kunzanira ya **ntebé ikunjwa** mbe nicaye, hanyuma umbwire ikibazo gihari.”

Kibanjwa aranyaruka amuzanira intebe, ariko aramubwira ati “uzi impamu se papa? Ndyanabo yabyutse nijoro ajya kureba tereviziyo bumukeraho, none kubyuka byamunaniye.”





Ako kanya, se ahita ahamagara nyina n'abandi bana, babicaza hamwe maze babagira inama. Babibutsa amasaha yo kuryama no kubyuka. Nyina arababwira ati" ni ngombwa kuryama kare kugira ngo mujye mubasha kubyuka kare mujya ku ishuri. Se yongeraho ati" kuryama bitinze bibagiraho ingaruka mbi zo kudakurikira mu ishuri maze mukaba mwatsindwa amasomo yanyu. Ndyanabo we yumvaga atazabishobora. Nyuma aravuga ati "ngomba kwisubiraho, nkajya ndyama kare kugira ngo mbyuke kare." Nyamara muri iryo joro na none yarabyutse, yihisha ababyeyi be areba tereviziyo.



Nyirantyoza na Kibanjwa babaduka mu buriri nk'uko bari basanzwe babigenza. Ababyeyi babo bo bari bazindutse kare cyane bajya ku mirimo kuko bakoreraga kure, kandi batangiraga akazi kare. Nyirantyoza na Kibanjwa bamaze kubyuka, babona Ndyanabo yihindukiza mu buriri. Bamubyukije yonera **kugundira ikirago** yanga kubyuka. Nuko Nyirantyoza na Kibanjwa bitegura vuba na vuba, bafata ifunguro rya mu gitondo, bafata ibikoresho byabo bajya ku ishuri. Ndyanabo we, aho yari ari mu buriri, yikururiraho ikiringiti yonera gusinzira ndetse atangira no kugona.

Kera kabaye, aza gukanguka. Yambara vuba na vuba, aterura igikapu yatwaragamo amakayi n'ibitabo agiterera ku rutugu, habe no kwihamura mu maso! Mu nzira agenda **aca ibiti n'amabuye**. Agitunguka ku muryango w'ishuri, abanyeshuri batangira kumunnyega, bamwe baravuga bati "nimurebe Ndyanabo igihe aziye ku ishuri!" Abandi bati "azaba uwa nyuma!" Naho abandi bati "mwarimu aramuhana!" Abandi bo bati "Ndyanabo afite ingeso mbi yo gukererwa!"

Nuko mwarimu amubaza uko byamugendekeye. Ndyanabo abanza guceceka, ako kanya mwarimu atangira kumutegurira igihano. Abandi banyeshuri bakomeza **kumukomera** bamuseka, ariko bigeze aho Ndyanabo ahitamo kuvugisha ukuri. Ati "mwari, kenshi nkunda kubyuka nkareba tereviziyo, bigatuma mbyuka ntinze." Ndyanabo yongeraho ati "mwari, ndakwinginze mbabarira irya none, sinzongera kurara ndeba tereviziyo ukundi, sinzongera no kuryamira ukundi rwose."



Mu minsi yakurikiyeho, Ndyanabo yisubiraho koko, akajya aryama kare, kandi akabyuka kare. Kuva icyo gihe, yakomeje gusobanukirwa ko buri gikorwa kigira igihe cyacyo.

Nuko ahinduka umwana w'intangarugero, akajya abaduka mu gitondo kare akitegura vuba, maze akajya ku ishuri adakererewe.

Nyirantyoza na Kibanjwa batangajwe n'ukuntu Ndyanabo asigaye abatanga kurangiza kwitegura ndetse akaba ari we uba uwa mbere kujya ku ishuri.

Kuva ubwo, Ndyanabo yahinduye imyifatire, asigara akora buri gikorwa mu mwanya no mu gihe cyacyo.

Ubibye ibitotsi asarura ingonera.



Inyunguramagambo

Injwiri: umusatsi wizingazingiye ku mutwe

Ndyumeho: nceceke, ninumire

Intebe ikunjwa: intebe bazinga

Guca ibiti n'amabuye: kugenda wihuta cyane n'umuvuduko mwinshi

Kumukomera: guseka umuntu icyarimwe basakuza.

Kugundira ikirago: kuryamira, gukomeza kuryama kandi igihe cyo kuryama cyarangiye.


Ubibye ibitotsi asarura ingonera: kuryamira ni ingeso mbi ituma abantu batagera ku musaruro wa nyawo.

Ibibazo byo kumva umwandiko



1. Ni bande bavugwa muri iyi nkuru?
2. Ni irihe tandukaniro ryari hagati ya Ndyanabo, Kibanjwa na Nyirantyoza?
3. Ni iki cyatumaga Ndyanabo atabasha kubyuka kare ?
4. Ni hehe Kibanjwa yagiye kurega Ndyanabo ubwo yari yanze kubyuka ?
5. Iyi nkuru irangira ite?
6. Ni ibiki bijya bigutwara igihe bikakubuza kwiga neza amasomo yawe? Ni izihe ngamba ufashe zo kubihindura cyangwa inama wagira abandi bana bitwara nka Ndyanabo?

Ubucuti bw'inyamaswa



Kera habayeho inkende zabaga mu ishyamba rya Nyamagera. Inkende imwe muri zo yitwaga Mpyorero. Izo nkende zirirwaga zisimbuka ziva mu giti zijya mu kindi. Muri iryo shyamba kandi harimo inzovu, intare, impara, imparage, impyisi, ingona n'**imbwa z'impwerume** nyinshi.





Nyina w'inkende Mpyorero, yari izi neza iryo shyamba ryose. Yari izi aho buri mugezi na buri nyamaswa byabaga. Muri iryo shyamba kandi hari hari ingona yari yarigize **akari aha kajya he**. Inyamaswa zose zatinyaga kujya kunywera ku mugezi yabagamo.

Nyina wa Mpyorero yari yarayihanangirije iyibwira iti “mwana wanje uramenye ntukajye kuri uriya mugezi kunywa amazi wenyine ingona itazakurirayo.”

Iyo ngona yari ihari koko. Buri munsi yaririmbaga igira iti “uyu munsi ndarya akanyama karyoshye, uyu munsi ndarya akanyama karyoshye!” Iyo yatangiraga kuririmba, inyamaswa nyinshi zashyaga uwwoba zikiruka zikandagirana ugasanga imwe iriruka ibwira indi iti “have **winsyonyora**, winsyonyora!”

Igihe kimwe, izuba riracana, **amapfa** aratera imyaka n’inyamaswa bibura amazi. Imigezi myinshi irakama ariko umugezi iyo ngona yabagamo wo ntiwakama.

Ya ngona igahora iririmba iti “uyu munsi ndarya akanyama karyoshye, uyu munsi ndarya akanyama karyoshye!” Yatangiraga kuririmba, inyamaswa zose **zigakizwa n’amaguru**.





Izuba ryakomeje kuba ryinshi, inyamaswa zimwe zitangira kwicwa n'inzara n'inyota.

Umunsi umwe, inkende Mpyorero n'incuti zayo ziyemeza kujya gushakisha amazi kuri wa mugezi wabagamo ingona. Uwo mugezi ni wo wonyine wari usigaye utarakama. Nuko zibanza gutega amatwi ngo zumve ko ingona iririmba ariko ntihagira icyo zumva.

Uwo munsi iyo ngona ntiyigeze iririmba nk'uko byari bisanzwe. Mu gihe zari ziteguye kumanuka ngo zitangire kunywa amazi, inkende Mpyorero irasakuza cyane iti "nimuhagarare!" Yongeraho iti "kiriya ni igiki kiri mu mazi? Ndabona gisa n'ingona, ariko ntikinyeganyega."

Mu gihe zikitegereza icyo gikoko, zibona gitangiye kunyeganyega. Hashize akanya zumva kiratatse cyane. Zitegereje neza, zisanga ni ya ngona.

Muri ako kanya, zose ziba zikwiye imishwaro. Zimwe zisimbukira mu mashami y'ibiti, izindi zihisha mu bihuru, izindi ziruka ubutareba inyuma.



Ya ngona ikomeza gutaka cyane. Inkende Mpyorero yumvise uko ya ngona itaka iribwira iti "umenya iriya ngona yagize ikibazo." Iherako imanuka mu giti isubira inyuma. Izindi nyamaswa ziyikubise amaso zirayibwira ziti "witondere iyo ngona." Nuko yegera ya ngona irayibaza iti "byakugendekeye bite?" Mu gihe itarasubiza, Mpyorero ibona igit ikinini cyajombye iyo ngona mu kanwa.

Mpyorero yumva iyigiriye impuhwe cyane. Nuko yenda umugozi munini maze ihambira umugozi kuri cya giti kiri mu kanwa k'ingona. Irangije irayibaza iti "none se koko wa ngona we, ubu ningukiza ntabwo uri bundye? Ntabwo se uzongera kurya izindi nyamaswa zigenzi zanjye?" Ingona irasubiza iti "mbabarira rwose unkize irya none, sinzongera kubahemukira!"

Ibyo byose izindi nyamaswa zabireberaga kure aho zari zihishe. Mpyorero irazihamagara iti "'nimumfashe nimumfashe.'" Nuko inyamaswa zose ziza ziruka zije gufasha Mpyorero ariko zisanga yamaze gutabara ingona yayikuye igit mu kanwa.



Hashize iminsi mike, imvura yongera kugwa nuko ya ngona itumira inyamaswa zose zabaga mu ishyamba rya Nyamagera ziza kuri wa mugezi yabagamo maze zisangira amafunguro n'amazi yo kunywa zishimye. Kuva uwo munsi iyo ngona yabaye incuti yazo.

Ineza irurura.

Icyo ubibye ni cyo usarura.



Inyunguramagambo

Impwerumwe: imbwa z'ingabo

Akari aha kajya he: kunanirana

Winsyonyora: winkandagira

Gukizwa n'amaguru: kwiruka cyane uhunga

Amapfa: ukubura kw'imvura cyangwa izuba ryinshi bitera kurumba kw'imyaka.

Ineza irurura: kugira neza bigabanya uburakari.

Ibibazo byo kumva umwandiko



1. Ni bande bavugwa muri iyi nkuru?
2. Ni iki ingona yakoreraga izindi nyamaswa iyo zazaga gushaka amazi mu mugezi yabagamo?
3. Ingona byayigendekeye bite hagati mu nkuru?
4. Ni gute ingona yashoboye kuva mu ngorane yari irimo?
5. Iyi nkuru irangira ite?
6. Ese waba warigeze gufasha mugenzi wawe kwikura mu kibazo?

Imbata yahindutse igishuhe



Umunsi umwe, imbata yari iraririye amagi yayo yota akazuba, imara umwanya munini iyarariye, igiye kumva yumva igi rimwe riraturitse. Mu gihe ikibaza ibibaye, ibona havuyemo agashwi keza cyane. Imbata irakareba irishima cyane iti “kwak, kwak.” Agashwi na ko kati “swiii, swiii.”



Umugoroba ugeze, havuka utundi dushwi tubiri twiza cyane. Nyina iratureba irishima cyane iti “kwak, kwak.” Udushwi na two tuti “swiii, swiii.” Nuko utwo dushwi twose dutangira gukarabywa na nyina ari na ko iducira umugani. Iyo mbata na yo yari yishimiye kumvwa n’abana bayo.



Hari hasigaye igi rimwe gusa. Iryo gi ryari rinini cyane kandi ntiryasaga n'ayandi. Iyo mbata irarifata, iraryitegerezza. Ikirigeza mu ntoki zayo rirashwanyuka. Nuko havamo umushwi munini w'ikijuju. Uwo mushwi wari ufile isura mbi cyane.

Utundi dushwi turawitegerezza turumirwa, nuko turawubwira tuti “mbega ukuntu uri munini! Mbega ukuntu usa nabi! Ukeneye kugira icyo unywa cyagufasha kugabanuka.” Uwo mushwi ubabazwa cyane no gusebywa n'abavandimwe bawo, wibaza impamvu y'izo **ncyuro** zose birawuyobera.




Muri ako kanya nyina w'utwo dushwi
iraduhamagara iti "kwak,kwak." Nuko itu jyana ku
mugezi aho inyamaswa zose zanyweraga amazi.

Inyamaswa zibonye wa mushwi zirumirwa.
Zirawubwira ziti "mbega ukuntu uri munini!
Mbega ukuntu usa nabi!" Wa mushwi urababara
cyane, uribwira uti "ubwo ngeze aho **guhebywa**
n'inyamaswa zose z'ishyamba, birakabije."



Nuko uhita wiruka ujya kwihiha mu gihuru, aho nta nyamaswa n'imwe ishobora kuwubona.


Uwo mushwi umara igihe kinini wihihe aho mu gihuru, kera kabaye utwana tw'impysi tuwunyuraho turi gukina. Turawubwira tuti "ngwino twikinire." Wa mushwi uradusubiza uti "namwe se kandi murashaka kuncyurira? Nimuhumure sincyumva ayo magambo ngo agire icyo antwara! Nimugende jye namwe nta ho duhuriye." Nuko utwana tw'impysi turigendera.



Mu kanya gato, kuri wa mugezi haza inyoni nini nziza z'ikigina cyane. Wa mushwi urungurutse ubona ari inyoni nziza cyane utigeze ubona. Izo nyoni na zo ziwubonye zirawubwira ziti “ngwino dukine.”

Wa mushwi ubitekerezaho, ariko hashize akanya urazibwira uti “oya! Oya sinakina namwe. Ndi munini cyane, mfite ibara ribi kandi ndi na mubi.” Izo nyoni zirawusubiza ziti “oya wee! Oya rwose ntabwo uri munini, nturi mubi kandi n’ibara ryawe si ribi na busa!” Zongeraho ziti “ngaho irebe mu mazi niba ugira ngo turakubeshya.”


Nuko wa mushwi uherako **usosoroka** mu gihuru utangira kwireba mu mazi.



Izo nyoni ntabwo zawubeshyaga. Uwo mushwi ntiwari munini kurusha iyindi. Ntiwasaga nabi kandi n'ibara ryawo ryari ryiza. Wari igishuhe nk'ibindi byose. Wirebye mu mazi, witegerezza na za nyoni ubona birasa neza neza.

Nuko uhita uguruka usanga ibyo bishuhe byene wabo. Mbega ukuntu wishimye!

Uburanga si umutima



Inyunguramagambo

Incyuro: Amagambo mabi abwirwa umuntu

Guhebywa: kugutera kwiheba

Usosoroka: uva mu bwihihisho


Uburanga si umutima: Imico myiza iruta ubwiza bwo ku mubiri.

Ibibazo byo kumva umwandiko



1. Ni izihe nyamaswa zivugwa muri iyi nkuru?
2. Kuki izindi nyamaswa zatangariye umushwi w'ikijuju?
3. Ni hehe uyu mushwi wahungiye nyuma yo gusebywa n'izindi nyamaswa z'ishyamba?
4. Ni iki cyateye uyu mushwi kuva aho wari wihishe?
5. Iyi nkuru irangira ite?
7. Ese kunegurana ni byiza cyangwa ni bibi? Ni iyihe nama wagira aabantu banegura abandi?

Semwishiwa akunda gufasha abandi



Semwishiwa yari umwana ukunda gufasha abandi cyane. Umunsi umwe ajya gusura mubyara we Nyiramwishiwa wari umaze iminsi mike yimukiye i Kabuye. Ageze mu nzu, aramubwira ati “iyi nzu ni nziza pe!”

Nyiramwishiwa aramusubiza ati “ni nziza ariko umenya ahari **yaratashywe** igihe kitaragera kuko imibu itumereye nabi.” Nuko Semwishiwa aramubaza ati “nta nzitiramibu mugira se?” Nyiramwishiwa ati “inzitiramibu zirahari ariko zikeneye **gukarishywa** mbere yo kumanikwa.”

Nuko Semwishiwa aramubwira ati “yooo! None se wantumye ku isoko nkakugurira **karishya** niba koko inzitiramibu zanyu zikeneye gukarishywa?”

Nyiramwishiwa ahita amuhereza amafaranga ati “ngaho genda urebe ko wayibona.” Nuko Semwishiwa arayakira ati “reka **nshwekure** ndabanguka.”



Mu nzira, ahura na nyirakuru ababaye cyane. Semwishywa aramubaza ati “byagenze bite se nyogoku? Ko mbona wababaye cyane?” Nyirakuru aramubwira ati “wahora ni iki mwana wa! Nari ndimo nitemberera none mpuye n’injangwe **iranshwaratura inshwanyaguriza** n’ikoti.”

Semwishywa aramubwira ati “yooo! None se ko nari ngiye ku isoko warimpaye nkarikudodeshereza?” Nyirakuru ahita amuhereza amafaranga n’iryo koti ati “ngaho genda mwana wa!” Nuko Semwishywa arabyakira ati “reka nshwekure ndabanguka.”




Ageze imbere ahura n'umuturanyi we Nyiraneza akurura ihene yikoreye n'umuba w'inkwi. Nyiraneza yari ababaye cyane kandi ananiwe. Semwisywa aramubaza ati “byagenze bite se ko mbona wababaye cyane?” Nyiraneza aramwitegerezza ati “wahora ni iki! Iyi hene ikeneye kujyanwa ku isoko kugurishwa kandi n’izi nkwi zigomba kujyanwa mu rugo.”

Semwisywa aramubwira ati “yooo! None se ko nari ngiye ku isoko wampaye iyo hene nkayikujyanira?” Nyiraneza ahita amuhereza ya hene ati “ngaho yinjyanire.” Nuko Semwisywa arayifata ati “reka nshwekure ndabanguka.”



Semwisywa ageze hafi y'isoko ahura n'incuti ye Nziraguseswa **yahuye** inka. Aramubaza ati "ugiyе he n'iyo nka kuri aya manywa?" Nziraguseswa aramubwira ati "ndayahuye." Yongeraho ati "ubundi se waje tukajya kwikinira tunayiragiye?"

Semwisywa aramwitegereza ati "reka **kunshwiragiza** nifitiye ibindi ngiyemo." Yongeraho ati "reka ahubwo nihute kuko amaso yanje atangiye **guhumywa** n'iri zuba. Tuzaba dukina ikindi gihe."



Semwishiwa ageze ku isoko abanza kugurisha ihene ya Nyiraneza, arangije agura karishya, hanyuma adodesha ikoti rya nyirakuru. Ibyo byose birangiye, asubira kwa mwishiwa we Nyiramwishiwa.

Mu nzira anyura kwa Nyiraneza amuha amafaranga yagurishije ihene, ashyira na nyirakuru ikoti rye.

Abo bombi baramushimira cyane.




Ageze kwa mwishywa we, amuhereza karishya. Nyiramwisywa aramubwira ati “urakoze cyane! Ndizera ko inzitiramibu zose ziza gukarishywa uyu munsi.”

Semwisywa aramubwira ati “nta kibazo!” Arongera ati “ahubwo reka ntahe burije.” Nuko Nyiramwisywa aramubwira ati “ba uretse gato, usomywe ku mutobe ubone gutaha.”

Nyuma yo kunywa umutobe, Semwisywa asubira iwabo anejewe no kuba yashoboye gufasha abandi. Agenda atekereza ukuntu azashaka akanya akajya gukina na Nziraguseswa.”

Gira so yiturwa indi.



Inyunguramagambo

Yaratashywe: yinjiwemo, yaratuwemo.

Gukarishywa: kongerwamo ubukana.

Karishya: umuti wica imibu ushyirwa mu nzitiramibu.

Nshwekure: niruke cyane.

Iranshwaratura: inshishimuza inzara.

Inshwanyaguriza: incagagurira.

Kwahura: kujyana amatungo mu rwuri.

Kunshwiragiza : kunjyana hirya no hino unyobya.

Guhumywa: kuba hari ikintu kiguteye kutabona.


Gira so yiturwa indi: ugira ineza ukayigirirwa wagira nabi na byo bikazakugaruka.

Ibibazo byo kumva umwandiko



1. Ni ba nde bavugwa muri iyi nkuru?
2. Ni ibihe bikorwa Semwishywa yakoze bigaragaza ko yakundaga gufasha abandi?
3. Kuki Semwishywa yanze kujya gukina na Nziraguseswa?
4. Ni iki kitwerekwa ko Semwishywa yakora obintu byiza?
5. Ni iyihe mpamvu yatumye Semwishywa ataha yishimye?
6. Hari ubwo ujya ugerageza gufasha abandi mu byo ushoboye? Sobanura uko ubigenza, kandi niba utabikoraga uvuge uko ugiye kubikora.

Ubujiji bwa Nyiranshywa



Habayeho umugore akitwa Nyiranshywa. Nyiranshywa uwo, yari injiji cyane. Ntiyari azi gusoma no kwandika. Ntiyashoboraga kwisomera amakuru yo hirya no hino. Yari afite isambu nini cyane, ariko nta cyo yari imumariye kuko yayihingaga imburagihe, agahinga atitaye ku bihe by'ihinga. Ibyo byatumaga hora arumbya.


Imyaka ye yahoraga **irumbywa** n'izuba indi ikarumbywa n'imvura nyinshi. Yarebaga mu mirima imwegereye akabona abaturanyi be bamusumbya umusaruro. Nuko akibaza ati "kuki mpore **nsumbywa** umusaruro n'abaturanyi banjye?"



Nyiranshywa uwo, yagiraga umwanda.
Abana be bahoraga **barembbywa** n'indwara.
Umubiri wabo wahoraga wuzuye imbyiro.
Yabagaburiraga ku masahani atogeje,
akabahera amazi mu gicuma kitarashiramo
inshywa.

Nuko agahora yivugisha ati “ndibaza impamvu abana banje bahora barembbywa n'indwara.” Iyo barwaraga, yabajyanaga kwa muganga ariko imiti bamuhaye akayibaha nabi maze indwara zikarushaho kubarembya.

Yarebaga mu ngo zimwegereye akabona asumbywa ubuzima bwiza n'abaturanyi be.



Ubuhinzi bwakomeje kumunanira, yigira inama yo kujya mu bucuzi. Nyiranshywa atangira kurangura ibicuruzwa, mu minsi mike aba atangiye gucuruza. Kubera kutamenya gusoma no kwandika, iyo umuguzi yamu haga inoti cyangwa ibiceri, ntiyamenyaga amafaranga yo kumugarurira. Ibyo bikamuhombya cyane. Yasumbywaga amafaranga n'abacuruzi bari begeranye. Nuko akibaza ati "kuki mpora ncuruza mpomba, ubu mpombywa n'iki ?"



Nyiranshywa amara iminsi yibaza icyo yakora kugira ngo agire ubuzima bwiza n'amahirwe nk'abaturanyi be. Akabyuka yicaye ku ibuye imbere y'inzu abaza **umuhisi n'umugenzi** icyo yakora. Umunsi umwe, Senshywa amunyuraho ajya mu nama ku Kagari, aramubaza ati "byakugendekeye bite se ko mbona witangiriye itama?" Nyiranshywa aramusubiza ati "wahora ni iki mwana wa ma, ko umwaku wabaye akarande kuri jye!" Yongeraho ati "nawe se, kuri uyu musozi wose ni jye ufite imirima irumbywa n'izuba ndetse n'imvura, ni jye ufite abana barembywa n'indwara, ni jye mucuruzi uhombywa n'ibije byose."



Nuko Senshywa amutega amatwi arangije aramubwira ati "yooo! Uzi ko bibabaje! None se ko nari ngiye mu nama ku Kagari waje tukajyana ukareka gukomeza **kwigunga?**"

Nyiranshywa abanza gushidikanya ariko bigeze aho arahaguruka aramubwira ati "hogi tugende!" Nuko bombi **bashyira nzira** baragenda.

Nyiranshywa yagendaga **agononwa** ariko Senshywa akomeza kumuhata. Yumvaga ababajwe cyane no kuba yasanze Nyiranshywa yigunze nk'utagira incuti.



Mu nama, Nyiranshywa yumva bavuga ku by'ibihe by'ihinga no gutera imbuto z'indobanure. Yumva bavuga ku byo kugira **akarima k'igikoni** no kugira isuku y'umubiri n'iy'ibikoresho. Yumva kandi bavuga ku byo kwihangira imirimo no kwiga gusoma no kwandika.

Kuri buri ngingo, Nyiranshywa akabaza Senshywa ati "ariko se ibyo bavuga birashoboka?" Senshywa akamusubiza ati "cyane rwose."



Inama irangiye Nyiranshywa abwira Senshywa ati "urabizi se, kuva uyu munsi ngiye kwiga gusoma no kwandika. Kuva uyu munsi kandi ngiye kwitoza kugira isuku ndetse no guhingira igihe. Ntabwo nshaka kuzongera gusumbywa ibintu byose n'abaturanyi banje. Wakoze cyane kunzana mu nama." Senshywa na we aramubwira ati "humura nzagufasha mu kwiga kwandika no gusoma."



Nyuma y'igihe gito, Nyiranshywa yari yejeje imyaka myinshi n'abana be bafite ubuzima bwiza.

Kuva ubwo, nta ndwara zongeye kurembya abana be, nta myaka ye yongeye kurumbywa n'izuba cyangwa imvura, kandi ubujiji ntibwongeye kumuhombya ukundi.

- **Umutwe umwe wifasha gusara.**
- **Nta mugabo umwe.**



Inyunguramagambo

Irumbywa: yanga kwera kubera ikintu runaka

Gusumbywa: kurushwa

Kurembywa: kurwara bikabije, ukanegekara.

Inshywa: imyanda iba mu gicuma kitaratangira gukoreshwa

Kwigunga : kuba uri wenyine wihebye

Gushyira nzira: gufata urugendo

Kugononwa: gukora ikintu udashaka

Umuhisি n'umugenzi: uwo ari we wese, uwo azi n'uwo atazi.

Akarima k'igikoni: umwanya muto wo mu rugo ugenewe guhingwamo imboga.

Umutwe umwe wifasha gusara: umuntu akenera ibitekerezo by'abandi.

Nta mugabo umwe: ubufatanye ni ngombwa mu bantu.

Ibibazo byo kumva umwandiko




1. Ni bande bavugwa muri iyi nkuru?
2. Kuki imyaka ya Nyiranshywa yahoraga irumba n'abana be bagahora barembye?
3. Ese Nyiranshywa nyuma yo kunanirwa n'ubuhinzi yigiriye inama yo gukora iki? Byo yarabishoye se? Kuki?
4. Ni uwuhe mwanzuro Nyiranshywa yafashe nyuma yo kuva ku Kagari mu nama na Senshywa?
5. Iyi nkuru irangira ite?
6. Hari abantu ubona aho utuye bafite ibibazo bitewe n'ubujiji? Ni gute wabafasha mu kubagira inama?

Gaju ihura na Bihogo



Kera habayeho inka y'**ishashi** ikitwa Gaju. Iyo nka yari nziza cyane. Yakundaga kuragirwa ku kazuba, ikarisha inazunguza umurizo wayo yikoma isazi. Buri gihe, iyo abantu bayinyuragaho, barayisuhuzaga bakayibwira bati “Ishi! Ishi! Ishi! Gaju.”

Iyo shashi Gaju, yari ifite mu ruhanga heza hagaragaza imico yayo myiza, igahora yishimye kandi ikagira urugwiyo, igakunda no gusabana. Iyo nka Gaju yari ifite ibanga rikomeye. Nta muntu washoboraga gutahura ko ifite impano y'ubushobozi budasanzwe.






Gaju yakundaga gukina umupira w'amaguru.
Waba se warigeze wumva inka aho ikina umupira
w'amaguru? Iyo ni yo mpamvu Gaju yakomeje guhisha
iyo mpano idasanzwe yari ifite.
Umworozi wa Gaju, ni yo yari yoroye yonyine. Ishashi
Gaju yatinyaga ko Shebuja yayibona ikina umupira
w'amaguru maze akayiseka. Nuko iribwira iti "reka
nzakomeze **ncweze**, naho ubundi abantu babimenye
banseka."

Igihe kimwe **ibyagiye** mu rwuri, iza kugira inzozi. Irota yiruka, igenda isimbagurika, itera umupira , icenga, itsinda ibitego. Yifuzaga kwambara umupira wo gukinana ufile ibara ritukura nk'umukinnyi yabonye kuri tereviziyo ya shebuja.


Iyo Gaju yabonaga nta muntu uyireba, yafataga umupira wayo wo gukina ikajya iwunyereza, iwutera, ikimenyereza gukina umupira w'amaguru, aho nta muntu uyireba.

Gaju yamaraga amasaha menshi yiruka, icenga, itera amashoti y'umupira nk'aho irimo gukina n'izindi nka, ikarangiza gukina inaniwe kandi ifite inyota.





Umunsi umwe, umworozи wa Gaju yabonye inaniwe cyane, agenda ayisanga yibwira ati “aho inka yanje **ntiyakapfakapfye** ibyatsi bibi ikarwara?” Ayigeze iruhande ariko abona atari ukurwara ahubwo imeze nk’ifite agahinda. Nuko yi yemeza gushaka ikintu yayikorera ngo yishime.




Muri uwo mugoroba, umworozi atahuka azanye inka y'ishashi y'ibihogo. Gaju igikubita amaso Bihogo irishima cyane kuko yari ibonye mugenzi wayo. Nuko irayakira, irabira cyane kubera ibyishimo iti "mbaaa! mbaaa!"

Iyiha ikaze yabira iti "mbaaa! Nitwa Gaju, nishimiye kukubona, urakaza neza iwacu." Nuko indi na yo iyisubiza yabira iti "mbaaa! Nanje nitwa Bihogo." Nuko Gaju yegera Bihogo itangira kuyibaza iti" ese wakwemera ko dukina imikino ?"

Bihogo iratangara ibaza Gaju iti "iyihe mikino?" Gaju ibanza gutinya no kugira isoni zo kuyibwira ko ikina umupira w'amaguru. Nuko Gaju ipfa kuvuga iti" nkunda kurisha ibyatsi." Bihogo ariko ntiyanyurwa n'ibyo Gaju iyisubije.

Nuko Gaju na Bihogo zibyagira mu kiraro zicecetse. Hashize akanya Gaju ibwira Bihogo iti “ubu ngiye kurisha.” Nuko irahaguruka iragenda. Igeze mu rwuri, itangira kurisha. Ika jya ikacanga ibyatsi, ikongera ikabikacanga ari na ko itekereza ku ncuti yayo nshya Bihogo.

Yumvaga itamerewe neza, ikumva nta bwisanzure. Nuko iribwira iti “nabonye incuti nshya Bihogo. Ndumva ntakomeza kubika ibanga ryanje ngo **ncweze**. Ngomba kwikuramo isoni maze nkabiyibwira.”



Nuko irahaguruka, izunguza umurizo, yikuramo ubwoba, isubira mu rugo. Igeze mu kiraro irinjira ngo irebe incuti yayo Bihogo irayibura. Iyirebera inyuma y'ikiraro irayibura. Iyirebera ahegereye ku kibumbiro irayibura. Nuko Gaju imara akanya iyishakisha. Igiye kumva yumva urusaku rwinshi rwavaga inyuma y'ikiraro. Urwo rusaku rwagiraga ruti "simbuka, simbuka, simbuka." Nuko Gaju itambuka buhoro buhoro, igana ahegereye ikiraro yumva rwa rusaku rukomeza kuvuga ruti "simbuka, simbuka, simbuka." Gaju ibona ni Bihogo ikina, itera amashoti, itera amacenga umupira w'amaguru, ikawutera ku mutwe, ku murizo, ku mugongo, ku nda, igakomeza ikawutera, ikawuteraaa.



Gaju ikirabukwa Bihogo iranezerwa cyane, irabira cyane kubera ibyishimo. Ako kanya yirukira mu kibuga aho Bihogo yakiniraga. Itangira gukina na yo. Nguwo umupira mu kirere, nguwo uridunda ku kibuga, bikomeza gutyo gutyo.

Bihogo na yo irishima iraseka. Gaju itangira kuyibaza iti "ukunda gukina umupira?" Bihogo isubiza Gaju iti "nkunda gukina umupira cyane rwose. Gaju iti "nanje ni uko." Bihogo iti "nari nagize ngo ukunda kurisha ibyatsi gusa." Nuko Bihogo na Gaju ziranezerwa, zabira cyane kubera ibyishimo maze ziraseka cyane.



Zimara igihe kinini ziseka kugeza ubwo umworozi yumvise urwo rusaku rudasanzwe rwavaga inyuma y'ibiraro by'inka ze. Nuko akingura idirishya ry'inzu, areberamo, abona za nka zikina wa mupira w'amaguru. Aratangara, ariyamira cyane ati "ntibisanzwe! Mbega amahirwe weee! Ubu se, si jye ku isi hose woroye inka zifite impano yo kumenya gutera umupira w'amaguru?" Nuko **yomboka** azisanga, atangira kuzogeza.



Inyunguramagambo

Ishashi: inyana itarabyara.

Ncweze: nceceke.

Ibyagiye: iryamye iruhuka.

Ntiyakapfakapfye: ntikanjakanje.

Yomboka: igenda buhoro.

Ibibazo byo kumva umwandiko




1. Ni ayahé matungo avugwa muri iyi nkuru?
2. Ni ibiki byarangaga Gaju by'umwihariko? Ni iyihe mpano yari ifite?
3. Ni iki umworozí wa Gaju yakoze kugira ngo ayishimishe?
4. Kuki ziriya nka zose zanezerewe nyuma yo kumenyana?
5. Iyi nkuru irangira ite?
6. Hari ubwo ujya ugira isoni zo kugaragaza impano yawe nko mu kubyina, mu gukina, kuririmba n'ibindi? Ni iki ugiye gukora kugira ngo ushyire impano yawe ahagaragara bitaguteye isoni? Niba hari undi mugenzi wawe ubibonana wamugira iyihe nama?

Imbwa ya Semfwati




Kera habayeho umugabo witwaga Semfwati, agatura ku musozi wa Gahomvomvywa. Yari atunze imbwa, akayikunda cyane. Nta cyo yayimaga: yayifataga neza, akayigaburira neza, akayigirira isuku.

Iyo mbwa, yari izi kurinda urugo cyane, ku buryo nta mujura watinyukaga kugira icyo yiba cyangwa ngo atere amahane mu rugo rwa Semfwati. Iyo mbwa yumviraga shebuja muri byose.



Imbwa ya Semfwati yakundaga inyama kurusha izindi mbwa zose. Cyakora, Semfwati yageze aho, abura inyama zo kuyiha, nuko ya mbwa iribwira iti “databuja ntakimpa akanyama, none amerwe agiye kunyica. Reka nigendere, nigire mu kindi gihugu, wenda nakwibonera undi databuja uruta Semfwati.”

Nuko imbwa ya Semfwati irakunyarukira irenga umusozi wa mbere igenda itunga amazuru hakurya no hakuno, **ireha** umwuka w'inyama ariko iraheba. Uko yagendaga yiruka, ni ko yarushagaho gusonza cyane maze ikamoka cyane. Irenga umusozi wa kabiri n'uwa gatatu igenda **ireha** ariko iraheba.



Semfwati we, agerageza kuyishakira mu baturanyi hose, atanga amatangazo hose, arenga imisozi myinshi ayishakisha, ariko arayiheba. Yahomvomvye cyane, kubera agahinda yari afite ko kubura imbwa ye yakundaga cyane. Abaturanyi n'incuti ze babonye ukuntu Semfwati **yahomvomwywaga** no kubura imbwa ye, baramubwiraga batî “reka guhomvomvywa n'imbwa! Yihorere rwose, amaherezo izagaruka.”




Imbwa ya Semfwati ikomeza kugenda, igeze aho irabukwa urugo rwarimo nyakabwana ebyiri. Izo nyakabwana zari zinanutse cyane. Nuko ya mbwa ya Semfwati irazegera, iraziramutsa. Irazibaza iti “ese hano murya inyama?” Zirayisubiza ziti “ashwi daaa! Twe twaragowe, hano **inzara iranuma!** Databuja adukoresha umurimo wo guhiga ariko nta cyo kurya kitugera ku munwa.” Ya mbwa ya Semfwati yumvise ibyo irumirwa, iravuga iti “ndabibona, mwaragowe. Ariko se muzihanganira ikibazo cy’inzara kugeza ryari? Mwaje tukijyanira?” Irongera ibaza izo nyakabwana iti “none se, byibura nta mata cyangwa ibijumba abaha?” Zirayisubiza ziti “ashwi daaa! Duhora **turyarywa** na databuja, buri munsi atwizeza kutugaburira ariko twarahebye.” Nuko ya mbwa ya Semfwati irazisubiza iti “iyo nzara sinayihanganira, murabeho ndagiye.”



Imbwya ya Semfwati ikomeza urugendo ishakisha aho yabona inyama, iza gutunguka mu rugo rwarimo imbwa ibyibushye. Iyo mbwa yari iziritse ku ishumi mu gikari, imoka cyane. Nuko ya mbwa ya Semfwati irayegera, irayiramutsa, irayibaza iti “ese hano murya inyama?” Irayisubiza iti “yego, turazirya buri munsi. Cyakora ubu jye naragowe, iyo ntarabutse gato, ndakubitwa. Databuja ankoresha umurimo wo kumurindira urugo ariko nta mutekano, nta bwisanzure, nta mahoro mfite. Buri munsi uko atahutse arankubita.”

Ya mbwa ya Semfwati yumvise ibyo irumirwa, iravuga iti “ndabibona, waragowe. Ariko se uzihanganira gukubitwa kugeza ryari? Waje tukijyanira?

“Irongera ibaza iyo mbwa iti “none se nta karuhuko na gato aguha? Irayisubiza iti “ashwi daaa! Mpore ndyarywa na databuja, buri munsi anyizeza kumpa akaruhuko, ariko narahebye.” Nuko ya mbwa ya Semfwati irasubiza iti “nubwo nshaka inyama, ariko izo nkoni sinazihanganira, urabeho ndagiye.”



Imbwa ya Semfwati imara igihe kinini izerera, ishakisha aho yakura inyama. Ikomeza guhura n'izindi mbwa nyinshi ariko igasanga zaba izirya inyama zaba izitazibona zose zifite ibindi bibazo byihariye itigeze igirira kwa Semfwati. Nuko ifata icyemezo cyo gutahuka.

Mu museso wa kare, ifata akabando irandara, igana ku musozi yaturutseho, imara igihe kirekire igenda, ariko amaherezo itunguka kwa shebuja. Shebuja akiyibona arishima cyane, maze yihutira kuyondora. Imbwa imaze kugarura agatege, imutekerereza uko byayigendekeye kose, maze irahira kutazongera guta shebuja ukundi.

Uwambaye ikirezi ntamenya ko cyera.



Inyunguramagambo

Ireha: ikurura umwuka wo mu kirere yihumuriza

Guhomvomvywa: kuvugishwa kubera ibibazo

Kuryarywa: kubeshywa

Inzara iranuma: inzara iraca ibintu

Uwambaye ikirezi ntamenya ko cyera: biragoye kumenya no kunezezwa n'ibyiza ufite.

Ibibazo byo kumva umwandiko



1. Ni ba nde bavugwa muri iyi nkuru?
2. Kuki imbwa ya Semfwati yafashe umwanzuro wo kwigendera?
3. Kuki imbwa ya Semfwati itagumye mu rugo rurimo imbwa ibyibushye kandi hari hari inyama?
4. Ni ibihe bibazo bitandukanye imbwa ya Semfwati yasanganye izindi mbwa yasuye?
5. Ni ikihe cyemezo iyi mbwa yafashe nyuma yo kugaruka kwa shebuja?
6. Hari ibintu bitandukanye wigiye mu ngendo wakoze cyangwa ahantu hatandukanye unyura? Nibabihari bivuge.

Igihembe cya 2

Incuti magara



Nyiramana ni umwana w'umukobwa w'imyaka icumi. Abana na Nyina Mukankusi. Umunsi umwe, Nyiramana yavuye ku ishuri abwira nyina ati "mwarimu yadusabye ko buri wese yandika inkuru ku ncuti magara ye. None se ko ntazi incuti yanje magara iyo ari yo, ubu koko iyi nkuru ndayandika nte?" Nuko nyina aramwitegereza, **aramwenyura** maze aramubaza ati "none se wa mwana utuye hariya hakurya y'umuhandwa, umwe mukunda kujyana kuvoma, si incuti magara yawe?"

Nyiramana ati "oya mama. Oya rwose. Uriya ni Sara, kandi Sara ni incuti y'abantu bose. Ni incuti yanje, ariko niba ari we ncuti magara yanje, simbizi."

Nyina ahita amubwira ati "noneho rero tekereza ku bana mwigana. Incuti magara ni umuntu ugukunda, **uguhangayikira** kandi mukunda kuganira mugaseka." Nyiramana ati "niba ari ibyo biroroshye. Ku ishuri turasabana cyane. Ubwo ndahitamo mu bana dukunda **gusabana.**"



Bukeye bwaho, hagwa imvura nyinshi cyane.
Igihe cyo gutaha kigeze, Nyiramana abaza
Simoni ati “sinasobanukiwe ibyo mwarimu
yatubwiye ku bijyanye n’**imvugakimwe**.
Wowe se wabyumvise?”

Simoni ati “jye nabyumvise ariko ubu ngiye
kureba murumuna wanje dutahe. Nta mwanya
mfite wo kugusobanurira.”

Nyiramana abibonye atyo yegea Mukamisha
na we aramubaza ati “sinasobanukiwe ibyo
mwarimu yatubwiye ku bijyanye n’imvugakimwe.
Wowe se wabyumvise?”

Mukamisha ati “nabyumvise, cyakora ubu
ndihuta, ngiye ku jyana na mama ku isoko. Nta
mwanya mfite wo kugusobanurira.”


Nyiramana akomeza gushakisha
uwamusobanurira ariko biba iby’ubusa.
Nyiraminani we aramusubiza ati “nabyumvise,
ariko umuturanyi wanje arantegereje, none ubu
ndagiye. Nta mwanya mfite wo kugusobanurira.”



Nyiramana akomeza kwibaza uko yabigenza ngo amenye incuti magara ye. Amara umwanya ahugiye muri ibyo bitekerezo. Uko gutekereza cyane byatumye yitura mu kiziba cy'amazi cyari aho!" Imyambaro ye ihita yandura, amavi n'amaguru bye na byobihinduka ibyondo gusa.




Ibyamubayeho byose abandi bana barabirebaga. Nuko batangira kumuseka bavuga bati “hahahaaa! Mbega ukuntu uhindutse! **Wahindanye** hose hose.” Simoni ati “ikanzu yawe yuzuye ibyondo.” Mukamisha ati “inkokora zawe zuzuye ibyondo.” Nyiraminani ati “dore re! No mu maso wabaye ibyondo gusa gusa!” Nyiramana agira ubwoba n’ikimwaro, maze atangira gutitira. Nuko agerageza kuva muri icyo kiziba cy’amazi. Abana bigana bari bari aho **bamushungereye**, bamuseka. Ibyo biramubabaza cyane.



Sara umuturanyi we yari amaze umwanya abarebera kure. Ababazwa cyane no kubona abana bigana na Nyiramana bamuseka aho kumufasha kuva muri icyo kiziba. Nuko aza yiruka amuhereza akaboko maze aramukurura amuvanamo, hanyuma yiyambura umupira we w'imbeho maze arawumutiza.

Nyiramana arishima aramubwira ati "urakoze cyane. Ni ukuri ungiriye neza." Sara ati "nta kibazo pe! None se incuti ko ari cyo ziberaho! Ahubwo reka turirimbe tubyine mu kanya gato uraba wumutse."



Nuko Sara aherako atangira kuririmba no gusimbuka. Mu kanya gato Nyiramana na we aba atangiye kuririmba no gusimbuka. Bararirimba barasimbuka biratinda. Barangije, imyenda ya Nyiramana itangira kumuka. Nyiramana yumvaga yishimye cyane.



Ageze mu rugo, abwira nyina ati “mama, uyu
munsi nabonye incuti magara yanjiye.”
Nyina **aramwenyura** maze aramuhobera.

Incuti nyayo uyibona mu byago.



Inyunguramagambo

Gusabana: Kuganira mwishimye.

Kumwenyura: guseka gake bikagaragara ku munwa gusa nta jwi ryumvikanye .

Guhangayika: kubura amahoro mu mutima bitewe n'ikibazo ufite.

Imvugakimwe: ijambo risangiye inyito n'irindi.

Wahindanye: wuzuyeho umwanda hose.

Gushungera: kwegera umuntu umuseka, umunyyega.


Incuti nyayo uyibona mu byago: ugukunda by'ukuri umubona mu bihe bigukomereye.

Ibibazo byo kumva umwandiko



1. Ni bande bavugwa muri iyi nkuru?
2. Inkuru yatangiye ite?
3. Ni ikihe kibazo Nyiramana yabwiye nyina igihe yari avuye ku ishuri?
4. Byagenze gute kugira ngo Nyiramana abone incuti ye magara?
5. Inkuru irangira ite?
6. Ni ibihe bikorwa byiza ujya ukorera inshuti zawe?

Uko Mahoro yize ikinyabupfura




Kera habayeho umwana w'umukobwa akitwa Mahoro. Mahoro yabanaga n'ababyeyi be mu Rugarama. Mahoro ni we wari **bucura** mu muryango w'iwabo. Yavukanaga n'abandi bana babiri, Ndahayo na Muneza.

Abo bana bombi barubahaga cyane.


Mahoro we agasuzugura bikabije.

Iwabo wa Mahoro bari baramutetesheje cyane.




Umunsi umwe, hari ku wa mbere, nuko se wa Mahoro ahamagara abana be bose ati "yemwe ba, nimujye kugaburira ziriya hene n'inkoko dore zirashonje." Ndahayo na Muneza basubiriza icyarimwe n'**ikinyabupfura** cyinshi bati "yego papa!" Nuko baherako bajya kuzigaburira.

Mahoro na we arikiriza ariko yanga kujyayo. Se abibonye atyo, azunguza umutwe, maze aribaza ati "ariko koko ubu Mahoro yigize ibiki?"




Bukeye bwaho, ku wa kabiri, se arongera arabahamagara ati "yemwe ba, nimuze mumfashe gusarura **ibihaza**." Ndahayo na Muneza basubiriza icyarimwe n'ikinyabupfura cyinshi bati "yego papa!" Nuko baherako bajya gufasha se gusarura ibihaza mu murima. Mahoro na we arikiriza ariko yanga kujayo.

Se abibonye atyo azunguza umutwe, maze aribwira ati "ariko koko ubu Mahoro yigize ibiki?"



Bukeye bwaho, ku wa gatatu, nyirakuru arabahamagara ati "yemwe ba, nimuze mumfashe kumesa." Ndahayo na Muneza basubiriza icyarimwe n'ikinyabupfura cyinshi bati "yego nyogoku!" Nuko baherako bajya kumufasha. Mahoro na we arikiriza ariko yanga kujyayo. Nyirakuru abibonye atyo azunguza umutwe, maze aribwira ati "ariko koko ubu Mahoro yigize ibiki?"



Bukeye bwaho, ku wa kane, sekuru
aramukira mu karima k'igikoni yuhira imboga.
Arabahamagara ati “yemwe ba, nimuze
mumfashe kuvomerera izi mboga.” Ndahayo na
Muneza basubiriza icyarimwe n’ikinyabupfura
cyinshi bati “yego sogoku!” Nuko baherako
bajya kumufasha kuzivomerera. Mahoro na we
arikiriza ariko yanga kuwyayo. Sekuru abibonye
atyo azunguza umutwe, maze aribwira ati “ariko
koko ubu Mahoro yigize ibiki?”




Bukeye bwaho, ku wa gatanu, nyina ajyana na bo ku isoko. Amaze guhaha arababwira ati “yemwe ba, ngaho nimumfashe gutwara ibi bikapu dutahe.” Ndahayo na Muneza basubiriza icyarimwe n’ikinyabupfura cyinshi bati “yego.” Nuko baherako bamwakira ibikapu yari amaze guhahiramo. Mahoro na we arikiriza ariko yanga kumutwaza. Nyina abibonye arongera azunguza umutwe, maze aribwira ati “ariko koko, ubu Mahoro akomeje kwigira ibiki?”





Mu kanya gato, Mahoro yegera Ndahayo na Muneza arababaza ati "ese mwaretse tugakina?" Baramusubiza bati "oya, nta mwanya dufite, ubu turatetse." Mahoro arabihorera asanga se aho yari ari mu murima ahinga aramubwira ati "papa, wansomeye inkuru?" Se aramusubiza ati "oya, oya Mahoro, ntabwo se ubona ko ndi guhinga?" Mahoro aramwihorera, asanga nyina aramubwira ati "ese wansokoreje imisatsi?" Nyina aramusubiza ati "oya, oya Mahoro, nta mwanya mfite, ubu ngiye ku isoko."

Ibyo Mahoro biramubabaza, amara umwanya
munini arakaye cyane, yibaza icyo yakora
biramuyobera.



Nyuma yaho, Mahoro abwira Ndahayo na Muneza n'ikinyabupfura cyinshi ati "rwose ndabasaba imbabazi kuko nabasuzuguye nkanga kubafasha imirimo itandukanye. Kuva uyu munsi nisubiye ho sinzongera gusuzugura." Baramusubiza bati "niba wisubiye ho, turakubabariye, umenye ko ugomba kugira ikinyabupfura ukajya ufasha abandi, ukitwara neza." Mahoro yumva yishimye cyane. Hashize umwanya, yegera se na nyina n'ikinyabupfura cyinshi arababwira ati "rwose ndabasaba imbabazi kuko nabasuzuguye nkanga kubafasha imirimo itandukanye. Kuva uyu munsi nisubiye ho sinzongera gusuzugura." Se na nyina baramusubiza bati "niba wisubiye ho, turakubabariye, umenye ko ugomba kugira ikinyabupfura ukajya ufasha abandi, ukitwara neza."

Barangije akazi, se ahamagara Mahoro, Ndahayo na Muneza, abicaza hamwe abagira inama y'uko bagomba kwitwara.

Igit i kigororwa kikiri gito.



Inyunguramagambo

Bucura: umwana wavutse bwa nyuma mu muryango.

Ikinyabupfura: imyitwarire umuntu akomora ku burere bwiza igaragarira mu kwiyubaha no kubaha abandi mu mvugo no mu ngiro.

Ibihaza: imbuto zera ku ruyuzi.

Igitikigororwa kikiri gito: umwana atozwa imyitwarire myiza hakiri kare.

Ibibazo byo kumva umwandiko



1. Ni bande bavugwa muri iyi nkuru?
2. Ni irihe tandukaniro riri hagati y'imyifatire ya Mahoro n'iy'abandi bana?
3. Ni iki kigaragaza ko Mahoro yasuzuguraga cyane?
4. Ni ukubera iki Mahoro yiye meje guhindura imyifatire ye?
5. Iyi nkuru irangira ite?
6. Hari umwana ufite imyitwarire nk'iya Mahoro uzi cyangwa wabonye?
Wamugira iyihe nama?

Uburenganzira n'inshingano by'abana




Abo turi bo bose, aho turi hose, mu mpande
zose z'isi, ubu burenganzira ni ubw'abana twese.
Haba munsi y'izuba, munsi y'ukwezi n'inyenyeri,
mu mijyi, mu byaro, mu misozi miremire, mu
bibaya, mu butayu no mu mashyamba, aho ari
ho hose, muri iyi si ngari, haganze uburenganzira
bwacu abana.





Mwumve ko abana twese dufite agaciro.

Muduterure mu gihe tuguye, nituyoba kandi muduhereze ikiganza. Nimuduhe ibyo dukeneye bidushimisha kandi bikadutera imbaraga, hanyuma mujye muhora mudukorera ibyiza, mu gihe icyo ari cyo cyose mutwiteho.



Abana twese dufite uburenganzira bwo kubaho,
tukarerwa, tugakura kugeza igihe dushobora
kwifatira ibyemezo.





Magisi, Zahara, Beti, Yuwani, Suyini, Reza, Mutoni, Pahulo, Yayiri, Yoko, Mugabo, Muhamadi..., buri mwana wese afite uburenganzira bwo kugira izina, akagira **umurage**.






Babyeyi, nimuturerere mu miryango yacu, kandi mu gihe tudafite umuryango, mudutware mu miryango yanyu kandi natwe mudukunde kimwe n'abandi. Nimutwemerere tubabwire ibyifuzo byacu. Nubwo amajwi yacu yaba ari mato cyangwa manini, nubwo twaba **twongorera** cyangwa dusakuza, nimutwumve. Twakoresha ibishushanyo cyangwa **twaca amarenga**, nimudutege amatwi mwumve ibyo tubabwira.



Nta muntu n'umwe kuri iyi si ufite uburenganzira bwo kudukomeretsa, n'iyo yaba mama cyangwa data. Nimuturinde igihe cyose, uwo ari we wese ushaka kutugirira nabi.




Twaba tubana n'ubumuga, bwaba ubw'ingingo
z'umubiri cyangwa ubwo mu mutwe, nimutwiteho
bidasanze, nimuduhe urukundo kugira ngo
tubebo twishimye.





Nimuhore mugenzura ko nta kibazo dufite.
Nimudufubike muturinde imvura n'ubukonje,
mu gihe cy'izuba ryinshi, **nimutwugamishe** mu
gicucu. Nimutugaburire neza, muduhe ibiribwa
n'ibinyobwa bikwiye, kandi mu gihe turwaye,
nimutuvuze kandi mutwiteho.



Nimutwigishe twese gusoma no kwandika,
nimuturere neza, nimuduteguire kuzaba
ingirakamaro, mu byo twifuza gukora byose.
Nimurengere isi dutuyeho, indabo, ibiti, imigezi,
inyanja... Nimutwigishe natwe kurengera isi
n'ikirere.



Abana twese dukwiye kugira umwanya wo
gukina, abana twese dukwiye kugira umwanya
wo kuruhuka igihe tunaniwe.



Mu gihe cy'intambara, mwidushora mu
mirwano, ahubwo nimuduhungishe, muturinde
ibyadukomeretsa byose.



Nimutwemerere gusenga mu rurimi rwacu,
haba mu nsenero, haba mu misigit, haba mu
kiriziya no mu zindi nyubako zose zisengerwamo.
Nimutureke turirimbe, tubyne, twambare
ibijyanye n'**umuco** wacu.

Kora uko ushoboye kose umenyeshe abantu
bose uti “uwo waba uri we wese, aho waba uri
hose, ubu ni uburenganzira bwa buri mwana.”



Nyamara n'ubwo dufite ubwo burenganzira, hari inshingano natwe tugomba kuzuza. Yewe mwana mugenzi wacu, menya ko dufite inshingano zo gufasha ababyeyi mu turimo duto duto two mu rugo. Menya ko kandi tugomba kurangwa n'ikinyabupfura kuri bose na hose.

Menya ko dukwiye kubaha ababyeyi bacu, abarezi, abavandimwe, incuti n'abaturanyi bacu, kandi tugakurikiza inama nziza baduhaye. Tugomba kandi kugira imico myiza, tukavugisha ukuri, tukirinda ingeso mbi zose.

Menya ko tugomba gufata neza ubuzima bwacu, tukirinda ibyabwangiza byose. Menya ko tugomba kugira isuku y'umubiri, iy'imyambaro ndetse n'iy'aho tuba. Menya gufata neza ibikoresho byose, byaba ibyo mu rugo, ku ishuri n'ahandi.

Utazi akazakura abaga umutavu.



Bifatiye kuri UNICEF (n.d) Children's Right and Responsibilities <http://www.unicef.org.uk>

Inyunguramagambo

Igihe umwana ashobora kwifatira ibyemezo: imyaka umuntu ageraho ntiyongere gufatwa nk'umwana muto.

Umurage: ibintu umuntu asigirwa n'ababyeyi iyo bamaze gusaza.

Kongorera: kuvuga buhoro ku buryo uwo mutegeranye atakumva.

Guca amarenga: gukoresha ibimenyetso ufite icyo ushaka kuvuga.

Kubana n'ubumuga: kugira ikibazo cy'ingingo zidakora neza.

Kugamisha: Guha umuntu aho yikinga imvura cyangwa izuba.


Utazi akazakura abaga umutavu: Kugirira umwana nabi ni bibi kuko aba azavamo umuntu w'ingirakamaro.

Ibibazo byo kumva umwandiko



1. Ni ba nde bavuga muri uyu mwandiko?
2. Ni nde ugomba kubahiriza uburenganzira bw'umwana?
3. Ni ubuhe burenganzira bw'umwana buvugwa muri uyu mwandiko?
4. Ni izihe nshingano z'umwana zivugwa muri uyu mwandiko?
5. Hari ibikorwa ubona bibangamira uburenganzira bw'abana aho utuye?
Wowe se hari insningano wumva ukwiye kuzuza nk'umwana aho uba?
Zivuge.

Nkunda igihugu cyanjye




Umunsi umwe, Mucyo yazindutse ajya ku ishuri nk'uko bisanzwe. Akihagera, abona imodoka yari ihagaze imbere y'ishuri ryabo. Mwarimu wabo Mugabo yari ahagaze ategereje ko abanyeshuri bose bahagera. Muri ako kanya, abanyeshuri bose baba **barahasesekaye**. Mwarimu wabo abahamagara ababwira ati" nimwinjire mu modoka vuba mwese, uyu munsi turigira ahandi hantu hatari aha."

Yaba Mucyo, yaba abandi bana, nta n'umwe wari uzi aho iyo modoka yari igiye kubajyana. Nubwo batari bazi aho iyo modoka yari ibajyanye, bose bari bishimye cyane, kuko bari bagize amahirwe yo gusohoka no kujya gutembera.



Uko imodoka yagendaga yihuta mu muhanda igenda inyura mu misozi n'ibisiza, ni ko abanyeshuri barushagaho kunezerwa, bakagenda batangarira ibyo babonaga. Bagendaga baganira, babyigana kuko buri wese yifuzaga kwicara hafi y'idirishya kugira ngo abashe kureba hanze. Bashakaga kugenda bareba ukuntu ibiti, abantu, imisozi na byo bisa n'ibigenda byiruka uko imodoka yagendaga yihuta.

Mucyo yitegerezaga ibyo yabonaga maze akamwenyura yivugisha ati "mbega igihugu cyacu ukuntu ari cyiza! Mbega amahirwe nagize yo kuvukira mu gihugu cyiza gitya! Muri urwo rugendo, Mucyo yibuka uburyo ishuri ryabo ryagiye kuvuga imivugo n'indirimbo byo kwizihiza umunsi w'intwari. Mucyo yibuka kandi ijambo umukuru w'igihugu yavuze ashima abantu bose bakoze ibikorwa by'ubutwari mu gihugu. Yibuka kandi ko umukuru w'igihugu, muri iryo jambo yasabye abantu bose cyane cyane urubyiruko gutekereza ku bikorwa byiza bakorera igihugu cyabo. Nuko Mucyo akomeza gutwarwa n'ibyo bitekerezo. Aribaza ati "ubu se koko, ni ikihe gikorwa cy'ubutwari nakorera igihugu cyanje?"



Uko imodoka yagendaga, ni ko abanyeshuri babonaga ibintu byinshi bitandukanye maze bakshima cyane. Bakabona udusozi twiza, ibibaya, imigezi n'ibindi. Bakabona kandi abantu bahinga , abacuruza, abagura n'abagurisha ibikoresho bitandukanye mu masoko n'amaduka. Bakabona kandi imodoka nyinshi zigenda n'izigaruka.

Babonye abaporisi ku muhanda, babapepera bamwenyura, nuko bareka imodoka yabo iratambuka bakomeza urugendo. Mucyo akomeza gutekereza cyane. Kuri we, yumvaga ko buri muntu agomba kugira igikorwa cyiza akorera igihugu cye. Akabona ibintu byose bimeze neza mu gihugu kandi hari n'umutekano. Ibyo bigatuma akomeza kwibaza icyo yakorera igihugu cye agakomeza akibaza mu mutima we ati “ubu se koko, ni ikihe gikorwa cy'ubutwari nakorera igihugu cyanjye?”



Mwarimu Mugabo we, yari agiye guhishurira
abanyeshuri be ibanga ry'urwo rugendo.

Baragiye, baragenda, baragendaaa, bageze
kuri Pariki y'ibirunga, mwarimu asaba umushoferi
guhagarika imodoka.

Aho muri Pariki, bahasanze abantu babishinzwe
barabayobora, barabatembereza, bagenda
babasobanurira ibyo bagendaga babona muri
pariki byose. Hanyuma, mwarimu Mugabo asaba
abanyeshuri bose kwandika mu makayi yabo
ibyo bagenda babona, hamwe n'ibisobanuro
byose bagendaga bahabwa n'abashinzwe
kubayobora.

Mucyo we agatega amatwi neza, akitegerezza,
akabona ibintu byose ari byiza, maze
agatangara ati “mbega ibyiza bitatse
u Rwanda!”



MURAKAZA NEZA

MURI PARIKI


Y'IBIRUNGA

Bakomeza urugendo, baragenda, bagera aho ingagi zari ziri.

Bagezeyo, bagira ibyishimo birenze. Bumvaga amakuru y'ingagi ariko batarazibona. Bajyaga babona amafoto yazo mu bitabo, ariko bari batarazibona **imbonankubone**. Abanyeshuri benshi bifuzaga guhagarara bakifotozanya n'ingagi, ariko zari zabateye uwomba.


Nyamara Mucyo we, nta bwoba yari afitiye ingagi, ahubwo yakomezaga gutekereza igikorwa cy'ubutwari yakorera igihugu cye n'ubwo bwose yari akiri umwana.

Yitegerezaga ukuntu igihugu cye ari cyiza, akabona ko hari abantu batandukanye babigizemo uruhare, kugira ngo igihugu kimere gityo. Aragumya aratekerezaaa, kera kabaye aza kugira igitekerezo cy'icyo yakorera igihugu cye. Fora ni ikihe gikorwa Mucyo yakoze?



Mu gihe abandi banyeshuri bandikaga ibyo babonye n'ibyo bumvise, Mucyo atekereza guhimba indirimbo ivuga ku byiza bitatse u Rwanda.

Yaribwiraga ati “ndabizi guhimba indirimbo ivuga ibyiza by'igihugu cyanjye ntibihagije habe na gato, cyakora nimara gukura, ndizera ko nzakora ibikorwa by'ubutwari, igihugu cyanjye nkagiteza imbere.”



Nuko atangira guhimba indirimbo, ayiha injyana inogeye amatwi, ayisubiramo kenshi. Mu gihe batahaga bava mu rugendoshuri, Mucyo we yari yarangije gutegura indirimbo ye neza. Nuko yegera mwarimu Mugabo aho yari yicaye maze aramwongorera ati “mfite indirimbo nshaka kwigisha bagenzi banje.” Nuko mwarimu asaba abandi banyeshuri guceceka, maze Mucyo araterura abigisha ya ndirimbo. Mu kanya gato abana bose batangira kuririmba indirimbo ivuga ku byiza bitatse u Rwanda, bagira bati “Ndagukunda Rwanda, mubyeyi wanje urankunda, ndi uwawe urantunze, nzakurwanirira wanyitayeho, nzaharanira icyubahiro cyawe. Reka nkuririmbire, igihe nzakura, nzagukorera kurushaho!”

N’izibika zari amagi



Inyunguramagambo

Urugendoshuri: urugendo abantu bajyamo bagamije gusura ahantu kugira ngo bagire ubumenyi ku bihari.

Gupepera: gusuza abantu ubamanikira ukuboko utabegereye

Imbonankubone: amaso ku maso.


N'izibika zari amagi: Umwana wese ashobora kuvamo umuntu w'ingirakamaro.

Ibibazo byo kumva umwandiko



1. Ni ba nde bavugwa muri iyi nkuru?
2. Ni hehe mwarimu Mugabo n'abanyeshuri be bakoreye urugendoshuri?
3. Ni ibihe byiza Mucyo na bagenzi be babonye mu rugendo bagize?
4. Ni ikihe gitekerezo Mucyo yagize igihe bari bari mu rugendo?
5. Iyi nkuru irangira ite?
6. Hari ibikorwa byo gukunda igihugu ubona bikorwa n'abantu b'aho utuye?
Ni ibihe wumva wagiramo uruhare ku rwego rwawe?


Ubutwari bwa Semana



Umunsi umwe, Semana yari aryamye, inkuba irakubita maze iramukangura. Imvura yagwaga ari nyinshi cyane. Uwo munsi ku ishuri yigagaho hari hateganyijwe amasiganwa. Yumvaga yizeye ko iyo mvura iza guhita vuba, kuko atashakaga gucikwa n'amasiganwa yari amaze igithe kinini yitegura. Nyamara, Semana yagendaga acumbagira. Ukuguru kwe kumwe kwari kurekure kurusha ukundi. Ntabwo yababaraga ariko kugenda yihuta byaramubangamiraga. Kwiruka byo byari umuziro kuri we. Kubera iyo mpamvu, nyina yahoraga yibwira ati “umwana wanjye ni umunyamahirwe make.”



Semana ariko we, ibyo ntibyamukangaga. Nta na rimwe yajyaga yiyumva nk'umunyamahirwe make. Rimwe na rimwe yagiraga agahinda nk'iyo abana bamubonaga bakamukomera. Iyo abantu bamuvugaga, ni bwo yarushagaho gukaza **umurego** mu kugerageza kwitabira ibikorwa abandi bantu batamugaye bakora. Nyamara iby'iryo siganwa byo, ymvaga bimuteye impungenge. Yibazaga ukuntu aza kwiruka imbere y'abantu benshi bikamuyobera. Yaribwiraga ati “ese mwo kabyara mwe, nindamuka nguye, nzabyuka nte? None se ndamutse mvunitse, nabyifatamo nte?”




Imvura yari imaze guhita n'akazuba katangiye kuva, Semana yari ari mu nzira ajya ku ishuri. Akagenda yibwira ati “iri siganwa riraba **nta gisibya**. Reka ngerageze nihute.”


Hirwa na Mbabazi na bo, bari bari aho mu nzira bagenda. Bahita bafatanya na we urugendo. Semana akagenda yibwira ati “byanze bikunze, aba bose ndaza **kubanikira**.”




Bageze ku ishuri, basanga abarimu bari gutegura abana ngo bajye mu isiganwa ku musozi wa Kabuye. Mwarimu Minani yari yateganyije ko aza Gutwara Semana ku igare kuko yatekerezaga ko biza kumugora kugera kuri uwo musozi. Semana ibyo biramushimisha cyane. Agenda yibwira ati “ariko ndi umunyamahirwe koko! Ubu mwarimu Minani yatekereje ate kuntwara ku igare rye?”



Bageze ku musozi wa Kabuye, basanze hari ikibuga cyiza kijyanye no gukorerwaho amasiganwa koko. Semana n'abana bigana bahita bajya ku murongo bitegura gusiganwa. Semana yumvaga afite ubwoba bwinshi, ariko akagerageza kwiha **akanyabugabo**. Nubwo yari afite ubwoba, yumvaga ko byanze bikunze agomba kwiruka ndetse akaba uwa mbere. Nuko ifirimbi iravuga, maze bose batangira kwiruka.



Semana yagerageje kwiruka nubwo
yacumbagiraga. Abana biganaga bo, barirkaga
cyane. Semana yagiye kubona, abona Hirwa
na Mbabazi bagarutse inyuma kumureba. Nuko
batangira kwiruka buhoro buhoro bagerageza
kumushishikariza kwihuta. Mu gihe birukaga,
Semana akagenda yumva amajwi y'abana benshi
bavuga bati "komereza aho Semana we, komereza
aho dore uri hafi kuhagera." Mu kanya gato,
Semana, Hirwa na Mbabazi bari bageze ku mpera,
ahari hateganyijwe kurangirira amasiganwa.
Mbega amahirwe weee! Mbega ibyishimo weee!




Abana batsinze, babahemba imipira yo kwambara myiza cyane, abantu bari aho bose babakomera amashyi.

Igitangaje ni uko Semana na we yagiye kumva akumva bamuhamagaye mu batsinze! Na we ahembwa umupira wo kwambara mu rwego rwo kumushimira ukuntu yagerageje kwiruka akarangiza isiganwa.

Abana bigana, bamukomera amashyi menshi cyane. Bose byari byabashimishije. Semana ahita yambara uwo mupira. Nuko akajya yibwira ati “mbega ukuntu ndi umunyamahirwe!”

Ushaka arashobora.



Inyunguramagambo

Nta gisibya: nta kintu kiri bubibuze kubaho.

Kubanikira: kubasiga cyane.

Umurego: umuvuduko, imbaraga nyinshi.

Akanyabugabo: umuhate n'imbaraga.

Ushaka arashobora: ubushake bugeza umuntu ku bikorwa bikomeye.

Ibibazo byo kumva umwandiko



1. Ni ba nde bavugwa muri iyi nkuru?
2. Kuki nyina wa Semana yamwitaga umunyamahirwe make?
3. Ni iki cyatumye Semana yiyemeza kujya mu masiganwa?
4. Ni iki kitwerekwa ko Semana yabaye intwari?
5. Iyi nkuru irangira ite?
6. Ni iki wifuzza kugeraho mu gihe kiri imbere ku buryo uzaba umuntu ukomeye?

Mutamu na Musheru



Kera habayeho ihene ikagira abana benshi. Muri abo bana b'ihene, Mutamu na Musheru ni zo zari ihene nkuru. Nyina w'izo hene yari ishaje cyane. Nuko ihamagara za hene zombi nkuru mu zindi, irazibwira iti “bana banje rero, murabona ko maze gusaza. Nkeneye ko umwe muri mwe yazansimbura, akaba **umukuru w'umuryango**, maze agasigarana inshingano zo guteganyiriza no kurengera umuryango wacu.”

Nuko za hene zombi zibyumvise, buri yose yumva ishatse gusigarana ubwo butware. Musheru itera hejuru iti “ni njye wabishobora.” Mutamu na yo isubiza ituje iti “nyamara ni njye wabishobora.”



Nuko nyina wa Mutamu na Musheru irazibwira iti
“kugira ngo haboneke uzasigarana ubwo butware,
reka mbahe umukoro maze uwukora neza, abe ari
we uzegukana ubwo butware bw’umuryango.”

Za hene zombi zihebebera icyarimwe ziti “meee!
Uwo mukoro ni uwuhe? Ni nde uzawutsinda?”
Nuko nyina wa Mutamu na Musheru irazibwira iti
“uyu munsi ndashaka kubatuma ku isoko kungurira
amagi, umunyu n’ifu.”

Yongeraho iti “ndabaha amafaranga angana,
hanyuma buri wese ahitemo isoko ashaka, maze
agure amagi, umunyu n’ifu byiza.”

Mbere y’uko zigenda, nyina irazibwira iti “mutege
amatwi. Dukeneye guteka vuba, none rero,
nimwakire amafaranga, munyaruke, ntimutinde mu
nzira, ntimurangare, mutava aho **mutaha amara**
masa maze tukaburara.”



Nuko aka kanya, Mutamu na Musheru zifata inzira ziragenda.

Musheru na Mutamu ziragenda zijya mu masoko atandukanye, zirahaha, zirangije zirataha.

Mu mwanya muto, zihurira mu nzira, buri yose itwaye agafuka karimo amagi, ifu n'umunyu. Mu nzira, Mutamu na Musheru zinyura ku mizinga y'inzuki.

Musheru ibwira Mutamu iti "hagarara gato, tubanze dushake ubuki twirire." Mutamu irasubiza iti "oya, oya rwose, mama akeneye amagi, ifu n'umunyu, kugira ngo ateke byihutirwa."

Nyamara Musheru yo, yegera imizinga y'inzuki itangira gupfundura. Ako kanya inzuki zose **ziyirohaho**, nuko ikizwa n'amaguru **yiruka** **amasigamana**.

Mu gihe yirukaga, amagi yari yaguze amenekera mu gafuka yari itwaye ku rutugu, isigarana umunyu n'ifu gusa. Ihene Mutamu irababara ibwira Musheru iti "sinari nakubujije koko?" Nuko Musheru ireba hasi, isubiza Mutamu iti " sinongera. Mama ndamusaba imbabazi, sinzongera guhubukira ibyo mbonye byose."



Ziragenda, ziragendaaa, zinyura ku mugezi.
Musheru na Mutamu zibona abarobyi bari mu
bwato baroba amafi. Musheru ibwira Mutamu
iti “hagarara gato, tubanze twirohe mu mugezi
twoge, cyangwa twirobere amafi.”

Mutamu irasubiza iti “oya, oya rwose, mama
akeneye guteka byihutirwa”. Nyamara Musheru yo,
ako kanya iba iratambutse yeagera umugezi maze
itangira gushora amaguru mu mazi.”

Ntiyigeze yibuka umunyu n'ifu yari isigaranye mu
gafuka. Ihita ihambira agafuka ku mugongo maze
yidumbura mu mazi.



Mu gihe yari igiyē **kumira nkeri**, irahebeba cyane,
maze abasare bari mu bwato bayibonye bahita
abajya kuyirohora **vuba na bwangu**.

Nuko Musheru igeze **imusizi**, yibuka ko yidumbuye
mu mazi ifite agafuka karimo ifu n'umunyu. Ireba
mu gafuka yari ihetse ku mugongo, isanga ifu
n'umunyu byashonze kera.

Mutamu irayibwira iti “sinari nakubwiye koko? Ubu
se mama, uramusobanurira ngo iki? Wagiye ureka
guhubukira ibyo ubonye byose .

Nuko Musheru ireba hasi, isubiza Mutamu iti
“mama ndamusaba imbabazi, sinzongera
guhubuka.”



Musheru yibuka amagambo nyina yari yazibwiye mbere y'uko zihaguruka, yumva igize agahinda ariko irihangana.

Nuko ziragenda zitunguka mu rugo, aho nyina yari yicaye izitegereeje. Mutamu yari yikoreye agafuka karimo amagi, ifu n'umunyu.

Naho Musheru yo yari yubitse umutwe, kubera ikimwaro. Nuko nyina wa Musheru na Mutamu izibonye irazibaza iti” ni nde muri mwe wazanye ibyo nari nabatumye?” Musheru yubura umutwe maze ibwira nyina iti “mama, Mutamu ni yo ikwiriye kuba umukuru w’umuryango wacu, irabishoboye. Njye namenye ko kuva ubu ngomba kwikosora, nkajya nitonda, nkirinda guhubuka.”

Ubwenge buza ubujiji buhise.



Inyunguramagambo

Gutaha amara masa: gutaha ubusa.

Ziyirohaho: ziyuzuraho ari nyinshi.

Kwiruka amasigamana: kwiruka cyane.

Umuzinga: Umutiba w'inzuki.

Kumira nkeri: kurohama mu mazi.

Vuba na bwangu: byihuse, mu kanya gato cyane.

Imusozi: hakurya y'amazi ku nkcombe.

Guhubuka: gukora ikintu utabanje gutekereza


Ubwenge buza ubujiji buhise: amakosa arigisha.

Ibibazo byo kumva umwandiko



1. Ni ba nde bavugwa muri iyi nkuru ?
2. Ni iki nyina wa Musheru na Mutamu yazibwiye?
3. Ni iki nyina wa Musheru na Mutamu yakoze kugira ngo ahitemo umutware w'umuryango uzamusimbura?
4. Byagenze bite igihe Mutamu na Musheru zari mu nzira ziva ku isoko?
5. Iyi nkuru irangira ite?
6. Ese hari ibintu wigeze gukora utabanje gushishoza bikaza kugira ingaruka zitari nziza? Ni gute ugiye kwirinda guhubuka mu gihe kiri imbere?


Ibuye ry'amayobera



Kera habayeho umwana akitwa Nyirantyoza akabana na nyirasenge Mutesi. Mutesi yakundaga gukoresha Nyirantyoza cyane. Nyirantyoza yageragezaga kwigengesera no gukora cyane ngo arebe ko yashimisha nyirasenge. Mutesi yagiraga **igitsure** agatoza abana gukunda umurimo.

Umunsi umwe Mutesi ahamagara Nyirantyoza ati "Nyirantyo, nzanira icyayi vuba nonaha." Icyo gihe Nyirantyoza yari mu gikari ku buryo atumvise neza icyo bamutumye. Nuko yiruka agana aho Mutesi yari ari ati "sinumvise neza icyo munshakira, nari ndimo mesera mu gikari."

Mutesi ati "nzanira icyayi none aha wa kanebwe we." Nyirantyoza ati "ngiye kukikuzanira none aha."



Bukeye bwaho, Mutesi abwira Nyirantyoza ati "uyu munsi ndashaka kurya **imegeri**. Jya kunshakira imegeri none aha wa kanebwe we." Nyirantyoza ati "ngiye kuzikuzanira none aha." Nyirantyoza agira ubwoba bwo kubwira nyirasenge ko igihe cy'imegeri cyarangiye. Nuko afata akebo gato yakundaga kwiciramo imegeri maze yerekeza mu ishyamba.




Mu nzira Nyirantyoza ahura na Sematyori amutekerereza ikibazo cye. Sematyori ati "yewe singuciye intege ariko ntibyoroshye kubona aho wica imegeri muri iki gihe. Cyakoze, pfa kugerageza urebere muri ririya shyamba riri hakurya hariya. Nubwo ari mu **ishyamba ry'inzitane**, rimwe na rimwe hajya haboneka imegeri." Nyirantyoza ati "urakoze cyane." Nuko yerekeza muri rya shyamba.



Nyirantyoza akimara kwinjira muri rya shyamba agira impungenge. Yabonaga iryo shyamba ridasanzwe, ahita **asesa urumeza**. Yumvaga hari umuntu uri muri iryo shyamba uri kwitegerezza uko ashakisha imegeri.

Nyirantyoza amara umwanya munini ashakisha imegeri muri iryo shyamba ariko araheba pe. Nuko yiyicarira ku kibuye kinini cyari aho muri iryo shyamba maze atangira kurira. Yibazaga ukuntu asubira imuhira nta megeri ajyanye bikamuyobera. Yumvaga nyirasenge atari bumukire.



Hashize akanya, Nyirantyoza abona urumuri rudasanzwe ruramukikije. Ahita yubura umutwe abona udukoko atari yarigeze abona. Utwo dukoko twarimo tubyina twishimye. Utwo dukoko twarabengeranaga umubiri wose .

Mu gihe yari akibaza ibyo ari byo, kamwe muri utwo dukoko kegereye cya kibuye Nyirantyoza yari yicayeho karamubaza kati “byakugendekeye bite se mukobwa mwiza, ko mbona wishwe n’agahinda? Aho ntiwazimiriye muri iri shyamba?” Nyirantyoza yumva ako gakoko gafite ijwi ryiza cyane atari yarigeze yumva mu buzima bwe.

Nyirantyoza aragasubiza ati “oya sinazimiye. Masenge yantumye imegeri ariko nazishakishije nahebye. Sinatinyuka kumugera imbere nta megeri mushyiriye. Hari icyo wamarira se?” Ako gakoko kati “cyane rwose. Ubu kuba wabashije kutubona ikibazo cyawe cyakemutse. Ubundi abo dushobora gufasha, ni bo bonyine bashobora kutubona.”

Ako gakoko karamwegera maze karamubwira kati “urabizi se, ubu wicaye ku ibuye ry’amayo bera. Uramutse ushyize ako gatebo kawé kuri iri buye wabona imegeri ushaka zose.” Nuko ako gakoko n’udukoko twose twari kumwe duhita tuzimira.



Nyirantyoza yumva asa n'urota. Akibaza niba ibyo amaze kubona no kubwirwa ari ukuri bikamuyobera. Nuko yenda ka gatebo ke maze agashyira kuri rya buye atangira kwibaza ati "harya ndashyira aka gatebo kuri iri buye mazeee ..."

Mu gihe yari atararangiza kwibaza uko abigenza, ahita abona imegeri nyinshi cyane zizamuka mu butaka iruhande rwe. Nyirantyoza ahita afata ka gatebo maze atangira kuzica kugeza igihe yujurije ka gatebo. Yumva arishimye cyane.



Amaze kuzuza agatebo ke, Nyirantyoza ahita ataha yiruka. Ageze mu rugo, nyirasenge amwakirana ibyishimo byinshi ati “urakoze cyane mwana wanjye.” Hari hashize igithe kinini cyane Nyirantyoza atabona nyirasenge aseka.



Kuva ubwo Nyirantyoza akajya ajya kwica imegeri muri rya shyamba buri munsi. Buri gihe nyirasenge akamwakira yishimye.

Ubuzima bwa Nyirantyoza buhinduka ibyishimo gusa gusa.

- **Uwitonze akama ishashi.**
- **Imbuto y'umugisha yera ku gitи cy'umuruho.**



Inyunguramagambo

Amayobera: ibintu bidasanzwe bisa n'ibitangaza, bigoye gusobanukirwa.

Gusesa urumeza: kuzana uduheri ku ruhu bitewe n'ubwoba.

Imegeri: uduhumyo duto turibwa.

Kugira igitsure: kutihanganira amakosa.

Ishyamba ry'inxitane: ishyamba rrimo ibiti n'ibihuru bifatanye ku buryo kunyuramo bigoye.

Uwitonze akama ishashi: igikorwa gikoranywe ubwitonzi n'ubushishozi gitanga umusaruro ushimishiye.

Imbuto y'umugisha yera ku giti cy'umuruho: ibyiza byose biggerwaho bigoranye.

Ibibazo byo kumva umwandiko



1. Ni ba nde bavugwa muri iyi nkuru?
2. Ni iki Mutesi yatumye Nyirantyoza kujya gushaka?
3. Byagenze bite igihe Nyirantyoza yageraga mu ishyamba?
4. Kubera iki ibuye rivugwa mu nkuru ryitwa ibuye ry'amayobera?
5. Iyi nkuru irangira ite?
6. Ni iyihe nyigisho ukuye muri iyi nkuru?

Ifi n'inyoni



Kera habayeho ifi n'inyoni zabaga mu majyaruguru y'u Rwanda. Iyo nyoni n'ifi zarakundanaga cyane. Ku **gicamunsi**, inyoni yakundaga kumanuka ikajya ku mugezi kunywa amazi no kuganira n'incuti yayo.



Igihe kimwe, inyoni ibwira ifi iti “aha hantu hasigaye hakonja cyane. Kandi rwose nnyewe ubukonje burambangamira.” Ifi iti “uzi ko nanjye nari ndimo mbitekerezaho? Numvaga nibaza uko twabyifatamo. Ubukonje bukomeje kwiyoungera kugeza n’ubwo amazi ahinduka urubura. Nanjye nanga ubukonje, butuma **nsesa urumeza** nkanatitira.”

Inyoni iti “ejo numvise inyoni zene wacu ziteganya kuguruka, zikazajya gushakisha ahantu hadakonje nk’aha. Byatumye ntangira kwibaza uko natwe twabigenza. Nari natekereje ko njye nafata iy’ikirere nawe ugafata iy’amazi tugahurirayo. Urabyumva ute se?”

Ifi iti “huuu! Icyo ni igitekerezo cyiza. Nari maze igihe nifuza gutembera ariko byarananiye. Ubwo hiyoungereyeho no kujya gushakisha ahantu haba hashyushye, ngaho reka tugende.”



Bukeye bwaho, iyo nyoni n'ifi zizinduka mu
museso wa kare zigenda. Inyoni yagendaga
iguruka naho ifi ikagenda yoga mu mazi. Buri
mugoroba, zarahuraga, ifi ikabaza inyoni iti
“hejuru iyo se, umwuka umeze ute?” Inyoni iti
“reka nta kirahinduka ubukonje ni bwa bundi.”
Hanyuma na yo ikabaza ifi iti “none se wowe wari
wabasha kugera ahari amazi adakonje cyane?”
Ifi iti “reka reka, wenda ahari ejo tuzarara tugeze
ahari amazi adakonje cyane.”



Inyoni yakomeje kuguruka n'ifi ikomeza kugenda
yoga mu mazi kugeza ubwo zombi zumvise
zinaniwe cyane. Nuko zircara ziraruhuka.

Hashize akanya, ifi ibaza inyoni iti “ese aho
ntitwaba twageze ahadakonje cyane? Ndumva
imbeho yashize, singititira ukundi.” Inyoni iti
“ni byo. Hano ndumva hari umwuka mwiza
udakonje. Reka ahubwo tuhigumire.”

Nuko inyoni n'ifi ziyemeza kwigumira aho.
Ziraryama zirasinzira, biratinda. Zikangutse, ifi
isanga izengurutswe n'amafi menshi cyane
y'amabara meza. Ayo mafi yari afite uburakari
bwinshi cyane ku buryo iyo fi byayiteye ubwoba
bwinshi. Nuko atangira kuyibaza ati “urakora iki
aha?”



Inyoni na yo ikangutse isanga izengurutswe n'inyoni nyinshi cyane z'amabara atandukanye itari yarigeze ibona. Izo nyoni na zo zari zirakaye cyane ku buryo iyo nyoni byayiteye ubwoba cyane. Nuko zitangira kuyibaza ziti "urakora iki aha?"



Ifi n'inyoni zagerageje kwisobanura ariko biba iby'ubusa. Inyoni ibibonye ityo ibwira ifi iti "**twagiye kera k'ubusa!**" Ubu se turabyifatamo dute mwokabyara mwe?"


Ifi iti "turaniwe cyane sinzi niba twashobora gukomeza kugenda. Reka tugume hano turebe uko bisa kugenda."



Nuko zombi ziramanuka zijya gufata amafunguro ya mu gitondo. Zigezeyo ariko, ntizashobora kubona amafunguro zari zisanzwe zimenyereye. Inyoni ibwira ifi iti “tubigize dute se kandi, ko inzara igiye kudutsinda aha?”

Ifi iti “ubwo tutabonye ibyo dusanzwe tumenyereye, reka dutegereze turebe ibyo amafi n’inyoni z’aha zirya, natwe tuze kuba ari byo tugerageza kurya.”

Nuko zihisha hafi aho zitegereza ko amafi n’inyoni zisanzwe aho ziza kurya. Igihe kigeze izindi fi n’inyoni ziza kurya. Nuko ya fi na ya nyoni zizihishamo maze zitangira gusangira na zo.



Umugoroba ugeze, ya nyoni ibona akanyoni gato karimo kagerageza kubaka icyari ariko byari byakagoye cyane. Nuko yiyemeza kugafasha kubaka icyo cyari. Bidatinze, ako kanyoni kari kari mu cyari cyiza cyane. Izindi nyoni birazitangaza.



Hagati aho, amafi yo yari ari mu mazi, yoga,
yibira akongera **akuburuka** ari na ko asangira
ibyatsi byiza ya fi yayazaniraga munsi y' amazi.
Ayo mafi abona ya fi yoga ku buryo budasanzwe.
Yatangazwaga n'ukuntu yibira mu mazi ikagera
kure cyane kuyarusha.

Agafi kamwe kari karimo karungurukira kure
kumiwe. Iyo fi yarakabajije iti “urashaka
kugergeza koga nkanjye?” Nuko itangira
kukigisha kwibira no kujya gushakisha ibyatsi munsi
y'amazi.

Mu kanya gato amafi yose ashaka kwiga kwibira
akajya munsi y'amazi kure cyane. Nuko ya fi
yigisha andi mafi yose koga.



Bukeye bwaho, ifi n'inyoni zabaga kuri ako gasozi ziza kureba ya fi n'inyoni zirazibwira ziti "mutubabarire kuba twarababwiye nabi mukigera aha."

- **Ineza yiturwa indi.**
- **Ugira ineza ukayisanga imbere.**



Inyunguramagambo

Ku gicamunsi: igihe cya nyuma ya saa sita hagati ya saa munani na saa kumi z'amanywa.

Twagiye kera k'ubusa: tugeze aho bikomeye.

Kuburuka: kujya hejuru ku mazi uvuyemo hasi.

Kwibira: kujya mu mazi hasi

Kumirwa: kubura icyo wakora.

Ineza yiturwa indi: akensi ibikorwa byiza byishurwa ibisa nka byo.

Ugira ineza ukayisanga imbere: ibyiza wakoze byanze bikunze bikugiraho ingaruka nziza.

Ibibazo byo kumva umwandiko



1. Ni ba nde bavugwa muri iyi nkuru?
2. Ni hehe ifi n'inyoni byari bituye?
3. Ni ikihe kibazo cyatumye ifi n'inyoni byiyemeza kwimuka?
4. Byagenze bite igihe ifi n'inyoni byari bigeze ahantu byimukiye?
5. Inkuru irangira ite?
6. Ni iyihe nyigisho ukuye muri iyi nkuru?

Igihembe cya 3

Ubusambo bw'impysi Warupyisi




Kera habayeho impyisi Warupyisi igatura ku musozi wa Birarenga. Warupyisi yabanaga n'umugore wayo ndetse n'abana bayo babiri, yari ikungahaye ku matungo no ku myaka, ariko ikagira ubusambo n'ubugugu byayirenze. Yari **nyamwigendaho**, ikiberaho yonyine, igaheza inyamaswa zose mu rugo rwayo. Yahoraga yivugisha iti “sinkunda **abamvogerera** urugo, nanga ko bagenzwa no kuvumba no gusabiriza.” Nuko igafata akanya igatambagira mu mirima yayo, igasura n'amatungo yayo yose. Yabihetura ikanezerwa, igatera akavugirizo maze ikaririmba iti” mbega ibyishimo, mbega ubutunzi, ibereho Warupyisi warakungahaye koko! “



Warupyisi yari ikungahaye koko. Yari ifite isambu ihagije, icyo ihinze cyose kikayikundira: urutoki, ikawa, imboga, ibijumba, ibishyimbo, imbuto n'ibindi byabarizwaga kwa Warupyisi.

Yari yoroye amashyo y'inka, umukumbi w'ihene n'intama, inkoko, n'ibindi. Nyamara muri ubwo bukungu bwose, ntiyagiraga incuti n'imwe, yewe nta n'inyamaswa yindi yakandagiraga kwa Warupyisi. Iyo yahishaga inzoga, yayinywaga yonyine, yabaga itungo, ikarya inyama zose yonyine. Imyaka yezaga yayihariraga n'umugore n'abana bayo, yamara kwijuta igafata umwanya igatambagira ubutunzi bwayo, itera akavugirizo, iririmba iti “nzajya ndya utwanjye ntawe umpagaze hejuru, nta cyo mpfana n'abakene n'injiji zitazi gukora.”



Muri ubwo busambo bwayo, Warupyisi ntiyemeraga ko hagira inyamaswa ikandagira mu rugo rwayo. Ititaye ku kiyigenza, yahitaga iyirukana ihuma, ivuza induru nk'itewe n'umujura.

Umunsi umwe, isega yaje iyisanga, ije kuyibwira ko hateye icyorezo cyica amatungo n'abana, ariko ko yari yamenye urukingo rwacyo.

Igihinguka mu irembo, warupyisi irayihinda, irahuma, ivuza induru igira iti" mvira mu rugo wa kantu we kagenda gahunahuna, gatunzwe no kurya umwanda no kwirirwa kanduranya!" Nuko isega irayisubiza iti" wanyirukana wagira, umenye ko nari nje kukuburira ko hateye icyorezo mu matungo no mu bana.


Ibyo isega yavugaga byabaye nko **guta inyuma ya Huye**, Warupyisi irushaho gu huma, iti "vuga uvuye aho ikikugenza ndakizi!" Nuko isega irikubura irataha.

Nyuma yaho, Warupyisi ihita yubaka uruzitiro rurerure kugira ngo ntihagire inyamaswa n'imwe yongera kugera cyangwa kurunguruka mu rugo rwayo.

Umagore wayo n'abana bayo bo si uko babibonaga. Bahoraga babwira se batii "nyamara nta mugabo umwe".




Ntibyatinze, amatungo ya Warupyisi yadukwamo n'indwara y'icyorezo. Inka zayo zirwara **muryamo** maze zitangira gupfa. Mu gihe gito, amatungo magufi na yo arafatwa maze atangira kugenda apfa **urusorongo**.




Mu minsi mike, umugore n'abana bayo bafatwa n'indwara bararemba bahera mu nzu babura kirwaza. Nuko umugore wayo arayibwira ati "mugabo wanje rero, urabona ko **dusumbirijwe**, amakuba yateye urugo rwacu none gerageza dufatanye tujye inama y'icyo twakora. Dukwiye kwegera abaturanyi bacu bakadufasha cyangwa bakatugira inama y'icyo twakora." Abana bayo na bo bungamo bati "ni byo koko, kandi nyamara ya sega yari yabikubwiye uranga urayihinda." Nyamara Warupyisi **ntiyavaga ku izima**. Ibyo yagirwagaho inama byose nta na kimwe yemeraga gukora.

Ubugugu bwayo n'ubusambo byatumaga ikomeza kwinangira umutima ikavuga iti "jye Warupyisi sinkunda abantu bamvogerera urugo. Ni abashaka kundira ibyanje cyangwa kunsabirizaho." Nuko irakomeza **iratsimbarara**, yanga kugira uwo ibwira ikibazo cyayo. Amatungo akomeza gupfa bigera aho asigara abarirwa ku ntoki. Umugore wayo n'abana bashegeshwu n'indwara, babura uwabasura, bakomeza gushengurwa n'agahinda.




Mu ijoro, Warupyisi ifata icyemezo cyo kujya kubitekerereza isatura yari ituye mu ishyamba rigari rya Rwanamigabo. Isatura yari izwiho ubushobozzi budasanzwe bwo gutanga imiti ihosha indwara n'ibyago bitera mu ngo. Nuko Warupyisi izinduka mu bunyoni, ifata inzira ijya kureba isatura. Mu nzira inyura ku ishyamba ry'ibiti birebire. Ibona akanyoni gato karirimba kagira kati "Warupyisi, Warupyisi, mbega ngo urabona akaga! Warupyisi, Warupyisi, mbega ngo urabona ishyano! Ubugugu bwawe bugiye kugukoraho!"

Nuko Warupyisi irakabaza iti "ushatse kuvuga iki wa kanyoni we?" Akanyoni karongera kararirimba cyane kati "genda usangire n'abandi ibyo utunze. Gusangira n'abandi ntabwo bigabanya umutungo wawe. Gusangira n'abandi ntabwo bigabanya umutungo wawe."



Warupyisi irarakara, ifata ibuye itera ako kanyoni ngo ikirukane karekeraho kongera kuyibwira gusangira n'abandi. Nyamara akanyoni kanga kugenda, gakomeza kuyiherekeza mu rugendo. Mu nzira, akanyoni kagendaga karirimba, kabwira Warupyisi amagambo amwe. Nuko akanyoni karushaho kuririmba kati "genda usangire n'abandi ibyo utunze. Genda usangire n'abandi ureke ubusambo, genda ureke ubugugu."




Nuko Warupyisi ikomeza urugendo igana kwa Satura, akanyoni kayiri hejuru.

Mu gihe itaragerayo, ihura n'imbeba. Iyo mbeba irahagarara ibaza Warupyisi iti "Warupyisi urava he ukajya he?" Warupyisi irayirengagiza iti "mva imbere wa kabeba we. Wahamenyaga se ngo umfashe ibibazo byanje?"

Nuko imbeba iherako irayibwira iti "ibibazo ufile ni wowe ubyitera! Wabaye igisambo, uba umunyabugugu, none rero, iyaba wasangiraga n'abandi ibyo utunze, ukareka urugo rwawe rukagendwa, nta kibazo wagira."

Nuko Warupyisi irahagarara, iriyumvira. Iribaza iti "utu tunyamaswa aho si utwo banterereje ra? Ko twose tuganisha ku mutungo wanje, aho si ugushaka kumaraho n'utwo nari nsigaranye?"



Warupyisi ikomeza guhata inzira ibirenge igana kwa Satura. Nyamara ya mbeba na ya nyoni bikomeza kuyiherekeza biggerana kwa Satura. Satura ibona Warupyisi ihingutse iherekejwe n'imbeba n'inyoni. Inyoni irushaho kuririmba ibwira Warupyis iti “genda usangire n'abandi ibyo utunze. Genda usangire n'abandi ibyo utunze. Genda usangire n'abandi ureke ubusambo, ureke ubugugu.” Imbeba na yo itangira kwikoza hirya no hino maze ikavuga mu ijwi riranguruye iti “wabaye igisambo, uba umunyabugugu, none rero, iyaba wasangiraga n'abandi ibyo utunze, ukareka urugo rwawe rukagendwa, nta kibazo wagira.” Isatura itega amatwi ibyo iyo mbeba n'inyoni zabwiraga Warupyisi. Nuko iherako ibaza Warupyisi iti “hari icyo se upfa n'iyi mbeba cyangwa n'iyi nyoni?” Nuko Warupyisi irasubiza iti “ashwi da! Nuko isatura ibwira Warupyisi iti “mugenzi wanje, genda ukurikize ibyo iyi nyoni n'iyi mbeba bikubwira. Nihatagira igihinduka uzagaruke mbone kugushakira undi muti.”




Warupyisi ibura ikindi irenzaho, nuko ifata inzira isubira mu rugo rwayo. Mu nzira, igenda yibaza uko igiye kubigenza. Ikingera mu rugo itekerereza umugore n'abana bayo iby'urugendo rwayo, ibatekerereza iby'imbeba n'inyoni yahuye na zo mu nzira n'amagambo zayibwiye.

Nyamara yasaga n'ifite ikimwaro kuko abana n'umugore wayo nta ko batari baragize na bo bayigira inama yo kubana neza no gusangira n'abaturanyi.



Nuko Warupyisi ihamagara inyamaswa zituranye zose izitekerereza ibibazo yagize byose. Inyamaswa zari zituranye na yo zose zabanje gutinya kuza ariko zigeze aho ziraza. Nuko Warupyisi izisaba imbabazi, yicuza uburyo yaziheje mu rugo rwayo. Inyamaswa zari zatumiwe ziyemeza kuyifasha mu bibazo yari ifite. Kuva ubwo, Warupyisi yiyemeza kujya yakira uje wese ayigana kandi ikajya ifasha uyiyambaje wese.

Akanwa karya ntiwumve kavuza induru ntiwumve.
Si jye wahera hahera ubugugu n'ubusambo bwa Warupyisi.



Inyunguramagambo

Kuba nyamwigendaho: kudafatanya n'abandi, kutagisha inama.

Guta inyuma ya Huye: kubwira utakwitayeho.

Gusumbirizwa: kuba mu bibazo byinshi cyane bikomeye.

Kutava ku izima: kutemera inama ugirwa n'abandi ugakomeza kwhagararaho.

Guhosha: gukemura amakimbirane/kurangiza intambara.

Mu bunyoni: mu gitondo cya kare, igihe inyoni zitangiye kuvuga

Guhata inzira ibirenge: kugenda urugendo rurerure utinuba, ufite umugambi wo kururangiza.

Kuvogera: kujya aho utaherewe uburenganzira

Muryamo: ni indwa y'indwara y'icyorezo itara mu nka cyangwa mu ngurube zigapfa ari nyinshi.

Urusorongo: buhoro buhoro,

Akanwa karya ntiwumve kavuza induru ntiwumve: Umuntu udasangira n'abandi nta ncuti agira imutabara.

Ibibazo byo kumva umwandiko



1. Ni ba nde bavugwa muri iyi nkuru?
2. Ni iki kigaragaza ko Warupyisi yari ifite ubukungu bwinshi?
3. Hari ibyo unenga cyangwa ushima kuri Warupyisi cyangwa izindi nyamaswa zivugwa mu mwandiko? Ni ibihe?
4. Ni ubuhe butumwa inyoni n'imbeba zagejeje kuri Warupyisi?
5. Iyi nkuru irangira ite?
6. Hari abantu ubona ari ba nyamwigendaho aho uba? Ni iki wakora kugira ngo utaba nyamwigendaho?

Uri mwiza Mama




Uri mwiza Mama
Koko uri mwiza si ukubeshya
Singutaka bimwe bisanzwe
Abantu benshi bakabya cyane.
Amezi icyenda mu nda yawe
Untwite ugenda wigengesereye
Udahuga wanga ko **mpugana**.



Ngo igihe mvutse ntarareba
Umfureba neza ndanezerwa
Ngira ubushyuhe imbeho ntiyaza
Imbehe yanjiye ubwo ikaba ibere.



Imirimo yawe ndayigutesha
Imiruho yanje ndayigukwiza
Amarira yanje ndayagutura
Ariko ugira uti “kira **kibondo.**”




A colorful illustration of a woman with dark skin, wearing a bright green dress and a pink headband, holding a baby in a red cloth. The woman is smiling and looking down at the baby. The baby is also smiling. They are sitting on a brown surface.

Nzakurata uko bigukwiye
Ibere ryawe ni indahinyuka
Kuko ndikesha ibyiza byinshi.
Amaraso meza ahorana **ubusire**
Umubiri mwiza utagira inenge
Bwa bugingo buzira indwara
Ngo ejo **ntazahona ntituye!**


Murezi utanga urugero rwiza
Uri Nyampinga ukagira ubuntu
Ntabwo urambirwa kuntamika
Ntujya usiba no kunkorera
Nyir'urugwiyo nzagushima.



Mubyeyi umpana **ntumpahamure**
Ururimi rwawe rugaba ituze
Urugero rwawe nzarutora
N'umuco mwiza njye nkwigana.



Nzakurikiza isuku yawe
Mawe nshima uri Mudasumbwa.
Sinakunganya undi mubyeyi
Ishuri ryawe riruta ayandi
Ubwenge bwa mbere wantoje
Ni bwo nahereyeho njya kwiga.



Kutiganda mfasha n'abandi
Ibyo mbikesha umutima wawe
Ntabwo **wangomwe** urwo rukundo
Utagukunda Rugori rwera
Nta cyo yaba amaze mu Rwanda.




Mutima mwiza uzira umunabi
Ineza yawe ivamo urukundo
Sugira sangwa uri Rudasumbwa
Abo wibyariye tukurate



Data azaguhe urugukwiye
Rumwe udukunda utizigamiye
N'uwaguhanze aguhore hafi
Azakurinde **amakuba** yose.
Ni ibyo ndangirijeho none
Ariko nzongera ngusubire
Kuko uri mwiza mawe nkunda.

Akabura ntikaboneke ni nyina w'umuntu



Bifatiye ku muvugo **Uri mwiza mama** wo mu gitabo cy'umunyeshuri "Gusoma 4," Ikigo cy'lighugu gishinzwe integanyanyigisho, 2004 urupapuro rwa 23-24.

Inyunguramagambo

Guhugana: kumererwa nabi.

Gufureba: gufubika.

Imbehe: isahaneikoze mu giti bariragaho kera. Bishobora kandi kuvuga ikintu kivamo ibitunga umuntu, ikimugaburira.

Ikibondo: umwana.

Ubusire: ubuzima bwiza.

Guhona: gupfa.

Kwitura: Kugirira neza uwakugiriye neza.

Nyampinga: izina bita umukobwa kubera imico myiza, ko ahuza imiryango, kuko ashobora gushyingirwa ahatari aho bavuka agahuza imiryango ymbi.

Urugwiyo: inea umuntu agaragariza uje amugana.

Impamo: indahiro.

Guhahamura: Gutera ubwoba.

Gutiganda: gukorana umurava.

Kugomwa: kwima.

Amakuba: ibyago.


Akabura ntikaboneke ni nyina w'umuntu: Umubyeyi afite akamaro ntagereranywa mu buzima bw'umuntu.

Ibibazo byo kumva umwandiko



1. Ni ba nde bavugwa mu muvugo?
2. Ni iki cyihariye kivugwa muri uyu muvugo?
3. Uyu muvugo utangira ute?
4. Ni ukubera iki umwanditsi ashimira nyina?
5. Uyu muvugo utandukaniye he n'inkuru zisanzwe twize?
6. Ni iki wumva wakora ngo witure ababyeyi bawe cyangwa abakurera ibyiza bagukorera?

Ngwino iwacu dutarame



Ngwino iwacu **dutarame**

Ngwino iwacu tubyine cyane.

Yeeeeee, ngwino iwacu dutarame.



Ngwino iwacu turirimbe twese

Ngwino iwacu tunezerwe.


Yeeeeee, ngwino iwacu dutarame.



Ngwino iwacu ducurange cyane,

Ngwino iwacu tuvuze ingoma.

Yeeeeee, ngwino iwacu dutarame.



Ngwino iwacu twivuge **ibigwi**,
Ngwino iwacu duhamirize
Yeeeeee, ngwino iwacu dutarame.



Ngwino iwacu duce **imigani**,

Ngwino iwacu **dusakuze**.

Yeeeeee, ngwino iwacu dutarame.



Ngwino iwacu dusimbuке,
Ngwino iwacu tuvuge imivugo.
Yeeeeee, ngwino iwacu dutarame.



Abana, abasore n'inkumi,
Ababyeyi, aho muri hose.
Yeeee, *ngwino iwacu dutarame.*

Akari ku mutima gasesekara ku munwa.



Inyunguramagambo

Gutarama (mu muco nyarwanda): guteranira hamwe ku mugoroba hagamijwe gusangira, gusabana no kwidagadura. Bimwe mu bikorwa by'igitaramo nyarwanda harimo kubyina, kwivuga, gusakuza, guca imigani miremire...

Ibigwi: Ibikorwa by'ubutwari.

Umugani (muremure): Inkuru ivuga ibitarabayeho, irimo amakabyankuru.

Gusakuza: Gukina umukino ugizwe no gutahura igisobanuro gihishe mu nteruro igize igisakuzo. Usakuza atangira agira ati "sakwe sakwe!" Usubiza na we agatangira gusubiza agira ati "soma."

Akari ku mutima gasesekara ku munwa: Iyo umuntu yishimye arabigaragaza.

Ibibazo byo kumva umwandiko



1. Ni hehe uvuga ahamagarira abandi kujya gutarama?
2. Iyi ndirimbo igizwe n'ibitero bingahe?
3. Ni iyihe nyikirizo y'iyi ndirimbo?
4. Ni ibihe bikorwa by'igitaramo bivugwa mu gitero cya kabiri?
5. Ni ibihe bikorwa by'igitaramo bivugwa mu gitero cya kane?
6. Mu muryango ubamo mujya mutarama? Ni uruhe ruhare wumva wagira muri ibyo bitararamo?

Turi magirirane



Ubara inkuru:

Kera habayeho intare yabaga mu ishyamba rigari **ry'inzitane**. Iyo ntare yari inkazi cyane.

Inyamaswa zose zarayitinyaga kandi nta ncuti yagiraga.

Yari yaratanzé itegeko ribuza utunyamaswa duto kuba mu ishyamba. Imbeba, inyoní, imiswá, amajeri n'utundi dusimba duto twahoraga twihishahisha.

Abantu na bo bahoraga bayinubira kuko yari yarabamazeho amatungo yabo. Umunsi umwe, intare yagendaga yivugisha.

Intare:

Ariko ningende ndakomeye koko! Utunyamaswa twose two muri iri shyamba ndadutegeka.

Nta kanyamaswa na kamwe kandusha imbaraga muri iri shyamba.

Ni yo mpamvu nta tunyamaswa duto nshaka iruhande rwanje.



Ubara inkuru:

Muri ako kanya, intare yitura mu mutego wari uri hagati y'ibiti bibiri, yikubita hasi maze inanirwa kuvamo. Nuko itangira gutabaza cyane.

Intare:

Orooo, Ororororooo! Yebaba weee!
Nimuntabare. Uwankura muri uyu mutego namugororera cyane weee!





Ubara inkuru:

Inyoni zari aho mu ishyamba zumvise urwo rusaku rukabije ziza kureba, zisanga intare igaragurika muri wa mutego.

Inyoni:

Yooo! Ntare, ese ni wowe? Ubu se ni nde wagutabara ko nta nyamaswa ikurusha imbaraga muri iri shyamba?
Dore uriya mushumba uje, ahari we aragutabara.



Umushumba:

Yeeeyeeeyeee! Iyi si ya ntare yatumazeho
amatungo? Ni nde watinyuka kuyegera?
Dore bariya bakerarugendo baje, ahari bo
baragufasha.



Abakerarugendo (bavugana bwoba):

Yemwe mwa nyoni mwe, yewe wa mushumba we, nta bwoba mufite bwo kwegera iyo nyamaswa y'inkazi? Ishobora kubyuka ikaturya twese. Yewe, twebwe ntitwakwegera kuko ubugome bwawe turabuzi, ariko dore hari imbwa ihingutse, yitabaze wenda iragutabara.



Imbwa:

Yeeeyeeeeyeee! Ayinyaaaa! Ni wowe ntare
wamaze amatungo ya databuja?

Ni nde watinyuka kukwegera?

Dore hari umukecuru uhingutse, mutabaze wenda
we arakugirira imbabazi!



Umukecuru:


Huum! Byagenze bite? Iyi ni ya ntare y'inkazi yatumazeho amatungo? Yewe birakomeye! Reka ngerageze ndebe, nta wugira uko undi agize.

Ubara inkuru:

Umukecuru agerageza kuyiterura ngo ayikure mu mutego ariko biranga.

Ako kanya, imiswa, imbeba biza bije kureba impamvu z'urwo rusaku.





Imbeba n'imiswa:

Ntare weee! Urimo uratabaza? Wibagiwe
ubugome bwawe? Ntabwo wibuka ko waduciye
muri iri shyamba? None se uba witabaza nde?
Gusa reka tugutabare, ubone ko ubugabo atari
ubutumbi.

Intare:

Nimumbabarire irya none munkure muri uyu
mutego. Ninkira, sinzongera kugira nabi ukundi!

Umukecuru:

Yemwe niba mwashobora gutabara iyi ntare nimugerageza itarahwana dore umutego urimo urayikanyaga.

Umushumba, abakerarugendo:

Mbega utugabo twirarira! Mwagiye mwiyemeza ibyo mushoboye! Ibyananiye abantu bafite imbaraga mwe mwabishoboza iki? Ngaho nimugerageze turebe.



Ubara inkuru:

Muri ako kanya, imiswa n'imbeba byadukira umutego wari wafashe ya ntare.

Imbeba zituruka hejuru, imiswa ituruka hasi, nuko bicagagura ya mitego **mu kanya nk'ako guhumbya.**

Ako kanya intare itangira kwinyagambura, maze iba iregutse, irahaguruka, irinanura, igira iti...


Intare:

Ahuuu! Nari mpfuye rwose! Bantu namwe nyamaswa mwese muri hano, kuva uyu munsi menye ko twese turi magirirane.

Twese turakenerana, ntabwo nzongera gusuzugura uwo ari we wese muri mwe.

Ni koko babivuze ukuri ngo "**nta mugabo umwe,**" kandi ngo "**inkingi imwe ntigera inzu.**"

Twese turi magirirane. Murakoze mbeba namwe miswa, iyo neza nzahora nyibitura.



Inyunguramagambo

Ishyamba ry'inzitane: ishyamba ririmo ibiti n'ibihuru byinshi kandi byegeranye.

Mu kanya nk'ako guhumbya: byihuse cyane, mu gihe gito cyane.

Nta mugabo umwe: umuntu agirwa n'undi, nta wishobora kuri byose.

Inkingi imwe ntigera inzu: hakenerwa abantu benshi kugira ngo buzuze igikorwa cy'ingenzi umuntu umwe wenyine hari ibyo atakwigezaho.

Ibibazo byo kumva umwandiko



1. Ni ba nde bavugwa muri iyi kinamico?
2. Intare yitwaraga ite mbere yo kugwa mu mutego?
3. Ni gute imbeba n'imiswa byashoboye gukiza intare?
4. Nyuma yo gutabarwa, intare yasezeranyije iki abari bahari?
5. Ni abahe bakinnyi wakunze muri iyi nkuru? Kubera iki?
6. Ni izihe nyigisho ebyiri z'ingenzi wakuye muri iyi kinamico?

Nzi kwandika ibaruwa



Gwiza ni mubyara wa Rugwiro. Gwiza
n'umuryango we baba mu mujyi wa Kigali. Naho
Rugwiro n'umuryango we bakaba mu Ntara
y'Amajyepfo. Rimwe na rimwe mu biruhuko,
Gwiza na Rugwiro bajya basurana.

Gwiza yishimira ibyo abona iyo yagiye gusura
umuryango wa Rugwiro mu cyaro, Rugwiro na
we akishimira ibyo abona iyo yagiye mu mujyi.
Umunsi umwe, Gwiza yamaze ibiruhuko bye kwa
mubyara we Rugwiro maze ataha yishimye.

Hashize iminsi mike, Gwiza akomeza kwibuka
ibintu byiza yabonye mu cyaro iwabo wa
Rugwiro maze yumva arushijeho kugira
urukumbuzi.

Nuko afata ikaramu n'urupapuro, yiyegezeza
n'ibahasha yo kuza gufungamo ibaruwa neza
arangije kuyandika. Nuko atangira kwandikira
Rugwiro.



Gwiza Mahoro Rita
Ishuri ribanza rya Remera
Agasanduku k'iposita 4250
Umujiyi wa Kigali

Kigali, ku wa 30 Gicurasi 2014

Kuri mubyara wanjye nkunda Rugwiyo Mariko,
Uraho urakomeye, ni amahoro? Amakuru
y'iminsi myinshi? Amasomo aragenda neza? Natwe turaho hano iwacu, ababyeyi
n'abavandimwe bameze neza.

Ikinteye kukwandikira, ndagira ngo nkugezeho
amakuru yanje. Mbere na mbere ndagira ngo nkumenyeshe inkuru nziza yuko
ubu nsigaye nzi gusoma Ikinyarwanda neza. Ubu nshobora kwisomera umwandiko
uwo ari wo wose n'inkuru iyo ari yo yose.

Nkwandikiye kandi kubera urukumbuzi numva
ngufitiye. Ndibuka ibihe byiza nagiriye aho iwanyu mu biruhuko bishize. Ndibuka
uburyo twajyanaga kwahira ubwatsi bwamatungo tugenda twitegerezza utunyon
twiza twabaga tuguruka mu mashami yibiti.

Ndibuka ukuntu twazindukaga maze tugafasha
marume gukama inka. Ese ya nka yigitare ntirabyara? Za nkoko se ziracyatera
amagi menshi?

Ndibuka kandi ukuntu twajyanaga na **masenge**
gusarura amasaka n'ingano mu mirima yo mu gacyamo. Ndibuka na none ukuntu ku
mugoroba twataramiraga kwa Nyogokuru maze akaducira imigani. Uzanyoyerereze
ya mafoto twifotoje igihe twajyanaga na marume Gashema gutembera ku kiyaga
cyo Kivu.

Ni byinshi nibuka byanshimishaga maze nkumva
ngize urukumbuzi rwo kongera kugaruka kubasura.

Ndangije nkwifuriza gutsinda ibizamini byose.
Untahirize cyane masenge, babyara banje Keza na Gahire. Data, mama na
murumuna wanjye baragutashya cyane!

Ugukunda,
Gwiza Mahoro Rita



Ibaruwa yageze kuri Rugwiyo bidatinze.

Igihe yari avuye ku ishuri, asanga ibaruwa ku buriri bwe. Nuko aratangira aribaza ati “iyi baruwa yavuye he? Ni nde wayirambitse hano ku buriri?

Yandikiwe nde?... Yaba se ari mubyara wanje Gwiza wanyandikiye?” Rugwiyo akiyifata abona yanditseho amazina yombi.

Rugwiyo yihutira kuyifungura vuba na vuba. Yumvaga afite amatsiko yo kumenya ibyanditsemo. Nuko abona ko ari mubyara we Gwiza wari wamwandikiye maze ariherera atangira kuyisoma yuzuye umunezero mwinshi.

Uko yayisomaga, ni ko yagendaga arushaho kwishima maze akajya **akubita igitwenge** agaseka.



Nuko Rugwiro amaze gusoma ibaruwa mubyara
we Gwiza yari yamwandikiye aranezerwa cyane.

Ni ko kwiyemeza na we gusubiza vuba na
bwangu mubyara we Gwiza.

Afata ikaramu n'urupapuro, yiyegezeza
n'ibahasha yo kuza gufungamo ibaruwa neza
arangije kuyandika, maze atangira kwandikira
Gwiza.

Rugwiyo Mariko
Ishuri ribanza rya Muhororo
Agasanduku k'iposita 123
Intara y'Uburengerazuba

Muhororo,
ku wa 02 Kamena 2014

Kuri mubyara wanje nkunda Gwiza,
Rambura amaboko duhoberane cyane!

Muraho ni amahoro? Mbega ibyishimo nagize maze kubona ibaruwa
wanyandikiye! Ntahiriza cyane ababyeyi n'abavandimwe bawe.
Nishimiye amakuru meza anyuranye wangejejeho.

Natwe rero turaho ni amahoro. Ubu ndiga
neza, amasomo ndayatsinda.

Ese wari uzi ko ubu nsigaye nzi guhimba
no kwandika inkuru zitandukanye mu kinyarwanda? Ninza kugusura
nzazana izo nkuru nzigusomere.

Data na mama byarabashimishije ku
buryo banyemereye ko tuzazana kubasura mu kiruhuko gitaha, maze
tugatemberera ku kibuga cy'indege i Kanombe.

Nkumbuye kongera kwitegerezza ya **mazu y'imiturirwa**, ya matara n'ibinyabiziga byinshi mu mianda. Ya nka
y'igitare abyaye inyana, na za nkoko zaturaze imishwi myiza cyane.
Nkoherereje na ya mafoto twifotoranyije igihe twajyaga ku kiyaga
cya Kivu.

Ndangije nkwifuriza amahoro n'amasomo
meza.

Ugukunda,
Rugwiyo Mariko

Nuko Rugwiro amaze kwandikira Gwiza afunga ibaruwa mu ibahasha maze yitegura kuyohererera Gwiza. Yumvaga anezerewe cyane. Mbere yo kuyifunga yibutse no gushyiramo ifoto y'urwibutso rw'igihe bari bajyanye na nyirarume Gashema gutemberera ku Kivu. Rugwiro yumvaga yishimye cyane, maze arivugisha ati "ndabizi aya mafoto azamushimisha cyane." Nuko Rugwiro akomeza kwivugisha ati "maze kumenya neza kwandika ibaruwa. Nzanza nandikira incuti zanje kenshi."

Ifuni ibagara ubucuti ni akarenge.



Inyunguramagambo

Marume: musaza wa mama.

Masenge: mushiki wa data.

Gukubita igitwenge: guseka ku buryo abantu babyumva.

Amazu y'imiturirwa: amazu maremare cyane.

Ifuni ibagara ubucuti ni akarenge: Gusurana bikomeza umubano n'ubucuti.

Ibibazo byo kumva umwandiko




1. Ni nde wabanje kwandikira undi ibaruwa muri iyi nkuru? Yayandikiye nde?
2. Ni he abandikirana batuye?
3. Kuki Gwiza yandikiye mubyara we ibaruwa?
4. Rugwiyo amaze kubona ibaruwa ya Gwiza yumvise ameze ate?
5. Rugwiyo amaze kuyisoma yakoze iki?
6. Ni iyihe mimaro y'ibaruwa?

Imparage yandika umwirondoro wayo



Igihe kimwe mu gitondo ubwo izuba ryari ritangiye kurasa, rwagati mu ishyamba rimwe ryo mu Rwanda, inguge n'icyiyoni byari birimo kumanika igitambaro kinini cy'umweru cyanditseho amagambo hagati y'ibiti bibiri binini by'inturusu.



Itangazo ry'akazi

Ishuri ry'incuke "Kura kibondo."
Turamenyesha buri wese ko dukekeneye abakozi
bo kwigisha abana b'inymaswa zo muri iri
shyamba. Uwumva ashoboye aka kazi, arasabwa
kwandika kandi agatanga umwirondoro we mu gihe
kitarenze ku wa gatanu ku gicamunsi.

Murakoze

Imparage na Bakame zari zirimo zitemberera,
zirahagarara ngo zisome icyo ibyanditse kuri icyo
gitambaro bivuga:

*Ishuri ry'incuke "Kura Kibondo," rirakingura mu
minsi ya vuba ku bana bose bafite imyaka kuva
kuri 0-2.*

Abakozi bakenewe: kuba ari abanyamurava,
bitonda kandi bakunda abana.

Amasaha y'akazi: kuva **mu rukerera** kugeza mu
kabwibwi.

Umushahara urashimishije.

Mwihutire kuzana inzandiko zisaba akazi,
ziherekejwe n'imyirondoro yanyu, bitarenze ku
wa gatanu ku gicamunsi.



Itangazo ry'akazi


Ishuri ry'incuke "Kura Kibondo."

Turamenyesha buri wese ko dukeneye abakozi bo kwigisha abana b'inyamaswa zo muri iri shyamba. Uwumva ashoboye aka kazi, arasabwa kwandika kandi agatanga umwirondoro we mu gihe kitarenze ku wa gatanu ku gicamunsi.

Murakoze

Imparage yashimishijwe cyane n'ako kazi.

Nuko ibaza Bakame iti “ese umwirondoro bivuga iki?” Bakame irayisubiza iti “mu mwirondoro wawe, wandikamo ibirebana n'akazi wakoze kugira ngo utanga akazi abashe kubona ko washobora ako kazi usaba.” Ukwiriye kandi kongeraho amazina yawe, igihe wavukiye, aho wavukiye n'amazina y'ababyeyi. Imparage ihita yikiriza iti “ooo! Ndabyumva.” Nuko ihita ijya gushaka urukoma rwiza rwo kwandikaho umwirondoro wayo. Imparage imara umugoroba wose yicaye ku ntebe, itekereza ku mirimo yose yakoze, maze ikabyandika ku rukoma.



Izuba rimaze kurenga, ijya kureba Bakame, maze ikomanga ku rugi. Bakame irayisuhuza iti “wiriwe ncuti, injira wicare.” Irakomeza irayibaza iti “nguhe amazi yo kunywa se?”

Imparage irayisubiza n’ikinyabupfura iti “wiriwe neza Bakame.” Amazi yangwa neza, ariko nari nje kukubaza niba waba ufile akanya ngo unsomere umwirondoro nanditse, umbwire ko nabikoze neza.”





Bakame irayisubiza iti “nta kibazo, biranshimishije rwose kugufasha.” Ubwo imparage ihereza Bakame umwirondoro wayo, Bakame irawakira itangira kuwusoma ihagaze aho **icyezezi** cy’ukwezi kimurika.

Ishuri ry'incuke “Kura Kibondo”

Umwirondoro w'Imparage.

*Ndi imparage ikunda gufasha, yihangana kandi
ibana neza n'inyamaswa zose zo mu ishyamba.*

Nitwa Mabarameza Mparage,

Navutse ku itariki ya 1 Mutarama 1998,

*Navukiye mu Ntara y'Iburasirazuba, Akarere ka
Nyagatare,*

Mama yitwa Nyirabyatsi Zuba,

Data yitwa Mabarameza Seshyamba.

*Nkunda gucira abana imigani no kubabwira
udukuru tuvuga ku buzima bw'inyamaswa zabaye
muri iri shyamba mu bihe byashize.*

*Nzi **uturirimbo twa gakondo** twinshi nigisha muri
korari kandi nzi no kuvuza ingoma.*



Mfite ubumenyi n'ubushobozibwo gukora
ibikorwa byinshi bitandukanye.

Ku wagatandatu no kucyumweru, jye n'uruvu
tuyobora ikipe y'inyamaswa ntoya.

Tuzigisha kurira ibiti, koga no gusimbuka.

Tuzigisha amoko y'indabo n'ibiti.

Tuzigisha amoko y'inyoni n'ibinyugunyugu.

Tuzigisha uko ziyyitaho no kugira isuku.

Tuzigisha uko zashaka ibyo kurya n'amazi.

Itangazo ry'akazi

Ishuri ry'incuke "Kura Kibondo."

Turamenyesha buri wese ko dukeneye abakozi bo
kwigisha abana b'inyamaswa zo muri iri shyamba.

Uwumva ashoboye aka kazi, arasabawa kwandika
kandi agatanga umwirondoro we mu gihe kitarenze
ku wa gatanu ku gicamunsi.

Murakoze

Nshobora gusoma no
kwandika. Nshobora
guteranya no gukuramo.
Nshobora gukuba no
kugabanya.
Nshobora no gukora
imigabane iyo
idakomeye cyane.
Nzi amazina yose y'ibiti
n'indabo byo mu
ishyamba.
Nzi amazina y'innyoni zose
ziguruka mu kirere.
Ndetse n'amoko yose
y'amaifi aba mu biyaga
n'imigezi.

Bakame isoma yitonze umwirondoro w'imparage, maze iravuga iti “ncuti, ndatekereza ko wanditse umwirondoro wawe neza. Wagaragaje neza amazina yawe, ay'ababyeyi bawe, igihe wavukiye n'aho wavukiye. Wasobanuye ibyo ukunda gukora kandi werekanye neza ibyo uzi gukora.”

Imparage ishimira Bakame, iyihereza akaboko, inyeganyeza ikinono yishimye.

Kora ndebe iruta vuga numve.



Inyunguramagambo

Mu kabwibwi: nimugoroba, igihe haba hatangiye kuza umwijima, ku buryo umuntu atabona neza.

Mu rukerera: mu gitondo, igihe urumuri ruba rutangiye kugaragara ariko hatarasusuruka.

Icyezesi: urumuri ruke.

Umwirondoro: inyandiko igaragaza amazina ya nyirawo, ay'ababyeyi, aho n'igihe yavukiye, ibyo azi gukora n'ibindi...

Indirimbo za gakondo: indirimbo zishingiye ku muco w'ahantu aha n'aha zidashingiye ku byavuye ahandi.


Kora ndebe iruta vuga numve: Ibikorwa biruta amagambo.

Ibibazo byo kumva inkuru



1. Ni izihe nyamaswa zivugwa mu nkuru?
2. Itangazo ryanditse ku gitambaro inguge n'icyiyoni byamanitse riravuga iki?
3. Akazi katangajwe ni ako gukora he?
4. Umukozi ukenewe agomba kuba ameze ate?
5. Uwifusa gusaba ako kazi agomba gukora iki?
6. Vuga ibikorwa bitatu uzi gukora.


Akanyamakuru k'ishuri



Mwarimu Kamanzi yari umuyobozi w'ishuri ryari hafi y'iwacu. Buri munsi, yazindukaga anyonga igare rye yerekeza ku ishuri. Yagendaga azamura akaboko asuhuza abantu bose ahuye na bo, kandi buri gihe yagendaga ashishikariza abana kwihuta igihe bari mu nzira bajya ku ishuri kugira ngo badakererwa. Igihe cyose yabaga yishimye ku buryo yahoraga aririmba, akubita akavugirizo cyangwa **amwenyura**.

Sangwa na Rita, na bo bakundaga kujya ku ishuri. Bakundaga kandi imirimo itandukanye yakorerwaga ku ishuri.

Mwarimu wabo Mutesi, yamanikaga udukuru twose bize ku rukuta kugira ngo abanyeshuri bose babashe kudusoma.




Mu nzira bava cyangwa bajya ku ishuri, Sangwa na Rita bagendaga baganira ku buzima bwo ku ishuri. Buri gihe bishimiraga uburyo abarezi babo bita ku bana bose kandi **bakanitangira akazi** kabo.

Rita: Ariko Sangwa, ubona ukuntu abarezi bacu badufasha cyane mu myigire bakanadushishikariza kwiga?

Sangwa: ibyo ni ukuri pe! Tekereza amahirwe dufite yo kugira ishuri ryiza nka ririya twigaho.

Rita: Ni byo rwose, byarushaho kuba byiza iyaba buri wese yabonaga ukuntu bwana Kamanzi na mwarimu Mutesi bakora ubutaruhuka kugira ngo ishuri ryacu ribe ryiza kurushaho.




Sangwa: Hmumm, uzi ko icyo ari igitekerezo cyiza! Ariko se ni iki twakora? Buriya se uwahimba indirimbo?

Rita: cyangwa se duhimbe umuvugo? Tubishyireho umwete. Mfite igitekerezo! Uratekereza iki ku kanyamakuru k'ishuri?"

Sangwa: Icyo ni igitekerezo cyiza cyane, dushobora kubona amakuru menshi yo gushyira mu kanyamakuru k'ishuri kandi buri wese utuye hafi y'ishuri yajya agasoma akamenya akamaro k'ishuri, ntibikomeze kumera nko mu bihe bya kera.

Rita: Dushobora kwandikamo udukuru, ibiganiro, ibishushanyo n'andi makuru yose yerekeye ishuri ryacu, tukanungurana ibitekerezo n'abantu bose baturiye ishuri ryacu.



Nyuma yaho, Rita na Sangwa bafata urupapuro maze baruhinamo kabiri. Batangira gutekereza ibyo bazakenera gushyira mu kanyamakuru kabo, hanyuma batekereza ku izina ry'akanyamakuru. Bemeza izina “Andika, soma amakuru.”

Batangiye kwandika inkuru, barazisoma, barongera bazisubiramo. Bashushanya ishuri ryabo ndetse n'abrimu babo. Bashushanya mwarimu Kamanzi ari guha ibihembo abanyeshuri barushije abandi. Bashushanya mwarimu Mutesi ari kwereka abana bo mu mwaka mwa mbere w'amashuri abanza uko bafata ibitabo bishya byo gusoma. Ako kazi bagakoze iminsi ibiri ikurikirana. Nuko barekeraho kuko bari bamaze kugera kuri ibi bikurikira....

Andika, soma amakuru No1....



Akanyamakuru k'ishuri ribanya rya Nyanza.

Andika, soma amakuru

Nomero ya 1

Abanditu : Tanguwa na Rita

Iromere amakuru yo mu ishuri ribanya rya Nyanza

Hintu bitanu
dukunda ku ishuri

1. Abarimu bacu baturigisha neza.
2. Abarimu badusomera inkuru zishimishiye, baturigisha udu kino n'uturirimbo
3. Umuni w'mikino n'imyidagaduro
4. Akanyamakuru k'ishuri
5. Amarushanwa yo kwandika no gusoma.

Alasomyi bitwuye neza:
Izaki na Mariya.



Mwarimu Kamanzu ahembba Izaki na Mariya.

Mu cyumweru gishize mwarimu Kamanzu yakembye abanyeshuri babiri bo mu mwaka wa gatatu. Abo ni Izaki na Mariya, barushije abandi kuba abasomyi beza. Mwarimu Kamanzu yashishikarije buri wese gukunda gusoma no kwandika.

Umurugo :

Nkunda gusoma

Nkunda gusoma myuguti


Nkunda gusoma inkuru

Nkunda gusoma amashuru

Gusoma ni bijza

Gusoma bitera kumenya.

Sangwa



Amakuru y' imikino
n' imyidagaduro

Mu cyumweru gishize,
dore imikino yabaye ku
ishuri :

- Kurruka metero ijana
- Guri mbuka metero
ebyiri
- Gukina umupira
w'amaguru

Iji mikino yon yarangiye
neza kandi yafashije
abanyeshuri kose kuruhuka,
kurushima no gusabana.

Isuku y'intoki, isuku y'ibitabo


Ku wa 14 kanama, ku
ishuri ryacu habaye umunsi
w'isuku. Abanyeshuri befata-
nyije n'abarezi gukora isuku
mu mashuri, mu kibuga no mu
nkengero z'ishuri.

Kyo birangiye, abarezi
befashie umwanya wo kugisha
abanyeshuri gukaraba intoki
meza bakoresheje amazi meza
n'isabune. Abarezi kandi
bastishi karije abanyeshuri gufata
neza ibitabo no kubigirira isuku.

Bukeye, Rita na Sangwa bafata akanyamakuru kabo, bagashyira mwarimu Kamanzi, bamwereka akazi bakoze.

Mwarimu Mutesi asoma akanyamakuru urupapuro ku rundi yumva **ibyishimo biramusabye**.

Ibyo biramunezeza, ashimira cyane Rita na Sangwa, maze ababaza niba yaba agumanye akanyamakuru kabo igithe bo bari mu ishuri.
Sangwa na Rita barikiriza, maze bajya mu ishuri.





Amasomo arangiye, basanga akanyamakuru kabo kamanitse ku giti cyari mu kibuga rwagati. Abanyeshuri n'abarezi bari bishimiye gusoma ako kanyamakuru.

Kuva uwo munsi, ikigo cy'ishuri cyatangiye kwandika akanyamakuru gasohoka rimwe mu kwezi. Buri wese mu baturiye ishuri yitabira gusoma kandi buri wese yari yishimiye abarimu **bakoraga ubutitsa** ngo abanyeshuri bige neza.

Inyunguramagambo

Kumwenyura: Guseka buhoro bikagaragara ku minwa no ku maso gusa udakubise igitwenge ngo cyumvikane.

Kwitangira akazi: Gukora akazi n'imbaraga zawe zose.

Gusabwa n'ibyishimo: Kuzura ibyishimo, kwishima cyane.

Gukora ubutitsa: Gukora cyane,gukora ubudatuza.

Ibibazo byo kumva umwandiko



1. Ni ba nde bavugwa muri iyi nkuru?
2. Ni iki Sangwa na Rita baganiragaho igihe babaga bari mu nzira bajya cyangwa bava ku ishuri?
3. Abo bana bombi babonaga bate ubuyobozzi n'imikorere y'abarezi bo ku ishuri ryabo?
4. Kuki Sangwa na Rita bahisemo gutangiza akanyamakuru k'ishuri?
5. Ni gute akanyamakuru k'ishuri kasakaye ku kigo no mu baturanyi?
6. Hari akanyamakuru waba warigeze gusoma? Kavuge uvuge n'ibantu bitandukanye waba warasomyemo?

Umugani wa Nyanshya na Baba



Kera habayeho umugabo n'umugore bakagirana abana babiri, umuhungu n'umukobwa. Umuhungu akitwa Baba naho umukobwa akitwa Nyanshya.

Bukeye uwo mugabo aza gupfa. Hashize iminsi na wa mugore arapfa. Abana basigara bonyine. Nyanshya na Baba bajya mu ishyamba, bakajya batungwa no gutega utunyoni.



Umuhungu ashakira mushiki we akazu mu rutare.
Umuhungu akajya ajya guhiga utunyoni. Umukobwa
agasigara aho. Umuhungu akaza nijoro. Yaba
atahutse akaririmba ati
“Nyanshya ya Baba, nyugururira, mwana wa mama
nyugururira. Nishe **akajeje** ni akawe nanje. Nishe
agaturo ni akawe nanje. Nishe **agafundi** ni akawe
nanje. Akanini karimo tuzakagabana.”

Mushiki we ati “baruka rutare Baba yinjire.”
Urutare rukabaruka. Akazana utunyoni bagateka,
umukobwa yaba afite agafu, **akarika**, bakarya.
Baca umugani ngo kanga mu jisho ntikanga
mu kanwa. Kandi ngo ahatari **umwaga** uruhu
rw'urukwavu rwisasira batanu. Bwacya mu gitondo,
igihe cyo mu bunyoni, musaza we akabaduka
akajya guhiga utunyamaswa two kubatunga.

Akica agafundi, akica udukwavu, akica agakware,
bwakwira agataha. Yagera kuri rwa rutare
akaririmba ati

“Nyanshya ya Baba, nyugururira. Mwana wa mama,
nyugururira. Nishe akajeje, ni akawe nanje. Nishe
agakwavu, ni akawe nanje. Nishe agafundi, ni
akawe nanje. Akanini karimo tuzakagabana.”

Nyanshya ati “baruka rutare Baba yinjire.”
Urutare rukabaruka. Musaza we akinjira. Bagateka
bakarya. Bwacya mu gitondo agasubira guhiga.



Bukeye hazo igipyisi, cyumviriza ibyo Baba avuga aririmba. Umunsi umwe kigerageza kumwigana.

Wa mukobwa ati "iryo jwi ko atari irya musaza wanje ?" Aricecekera, cya gisimba kiragenda ariko ntibyatinda kiza gushobora kwigana Baba.

Nuko kiraza kirahamagara, umukobwa ati "baruka rutare Baba yinjire." Urutare rurakinguka. Abona igipyisi kiraje. Ati "ye data we !"

- Sogokuru, ngukarangire utuyuzi tw'**utudegede**?
- Turakakudegeda mu nda.
- Sogokuru, ngukarangire utuyuzi tw'ibihaza?
- Yego mukaka wanje.

Bavuze ukuri ngo agati gateretswe n'Imana ntigahungabanywa n'umuyaga, kandi ngo umwanzi agucira akobo Imana igucira akanzu.

Wa mukobwa afata **akungo**, akaranga utuyuzi ati "rero sogokuru, urutaruka rujya hanze, ni urwawe, urutaruka rujya mu mbere ni urwanje, urujya mu rutara, ni urwa musaza wanje." Warupyisi iti "ndabyemeye."

Nuko akaranga za nzusi. Uruyuzi rumwe rurataruka, rujya hanze. Nyanshya ati "ngurwo urwawe ruragiye." Cya gipyisi cyiruka kijya hanze. Wa mukobwa ati "fatana rutare." Urutare rurafatana... Umukobwa aguma aho.

Cya gipyisi kiragenda.



Musaza we aza kuza nimugoroba, yongera guhamagara mushiki we uko asanzwe abigenza. Undi araceceka, agira ubwoba agira ngo ni cya gipyisi kije. Musaza we arongera arahamagara, mushiki we aza kumva ko ari we.

Abwira urutare ati “baruka Baba yinjire.” Urutare rurabaruka. Baba arinjira, asanga Nyanshya yagize ubwoba. Ati “ni bite?” Undi ati “ndeka aha haje ikinyamaswa kimpamagara nk’uko usanzwe umpamagara.” Maze nti “baruka rutare Baba yinjire,” urutare rurakinguka, mbona hinjiye igisimba.

Ndakibwira nti “sogokuru, ngukarangire utuyuzi tw’utudegede? Ngo turakakudegeda mu nda. Ngukarangire utuyuzi tw’ibihaza? Ngo “yego Mukaka wanjye.”

Ndakibwira nti “urujya hanze ni urwawe, urujya ku rutara ni urwa musaza wanjye, urujya mu mbere ni urwanjye.” Noneho uruyuzi rugiye hanze ndakibwira nti “fata.” Cyirukiye hanze mbwira urutare rurafatana, kimbwira ko nikigaruka kizandya.”

Nyamara ngo “**uguhiga ubutwari muratabarana**” kandi ngo “**utazi ubwenge ashima ubwe.**”



Musaza we yirirwa aho, yiriranwa icumu n'umuhoro agira ngo nikigaruka acyice.

Ariko cyari cyabumvirije kimenya ko ahari.

Agitegereza iminsi itatu nticyaza.

Inzara ibishe ahinduka mushiki we ati "umenya ari ubwoba bwari bwakwishe."

Nuko ajya guhiga utunyamaswa.

Igihe atarahiguka, cya gipyisi kiragaruka kirongera cyigana ijwi rye.

Umukobwa agira ngo ni musaza we, abwira urutare ngo rukinguke.

Agiye kubona, abona hinjiye cya kinyamaswa.

Ati "ntabwo ibyanje birarangiye." Akibwiye ngo agikarangire utuyuzi kiti "ntatwo nshaka."

Gihera ko kiramurya. Nyamara ngo **inda nini yishe ukuze** koko.



Musaza we aza kuza asanga cya gipyisi cyariye mushiki we, ahamagaye abura umwitaba. Abwira urutare rurakinguka, arinjira acana mu ziko.

Nuko arara aho, aryama ataryamye, bucy a jya guhiga icyo gipyisi. Arashishoza, abona ikirari cy'amaraso ya mushiki we, impyisi yari yagiye mu ishyamba.

Amaherezo avumbura cya gipyisi, agiye kucyica, kit "banza uce aka gatoke ukuremo nyogosenge nariye. Ca n'aka ngaka k'iburyo ukuremo so wanyu nariye. Tema n'iki gikumwe, ukuremo mushiki wawe." Baba abigenza atyo, agikuramo bene wabo.

Agitera icumu aracyica. **Anyaga** ibyo kwa cya gipyisi byose, nuko araboneza aritahira, ibyishimo ari byose.

Si jye wahera hahera umugani.

Bifatiye ku mugani "**Nyanshya na Baba**" Igitabo cy'umunyeshuri "Gusoma 3," lkigo cy'Igihugu gishinzwe integanyanyigisho, 2004.



Inyunguramagambo

Akajeje: akanyoni gato kaba mu ruhuri gafite ibara ryenda kuba ikijuju.

Agaturo: akajangwe ko mu gasozi.

Agafundi: akanyoni gato gakunda gushakira ibigatunga mu ngo mu mirama.

Kwarika: guteka amazi akabira yo kuvugamo umutsima.

Inkware: inyon iija kungana n'inkoko ku buryo inaribwa.

Amadegede: ubwoko bw'ibihaza byera ku nzuzi.

Akungo: agakoresho gakozwe nk'akabindi gato gakoze mu ibumba batekamo.

Umwaga: imyitwarire y'umuntu ukunda kuvuga nabi.

Guhiguka: kuva mu muhigo

Kunyaga: kwambura umuntu ikintu cye ku rugomo cyangwa kubera ko wamutsinze.

Inda nini yishe ukuze: ingeso y'ubusambo nyuma y'igihe igaruka nyirayo.

Uguhiga ubutwari muratabarana: ubutwari bugaragarira mu bikorwa bikomeye.

Utazi ubwenge ashima ubwe: iyo utarabona ibyo abandi bakora wibeshya ko ko ibywae aribyo bya mbere.

Ibibazo byo kumva umwandiko



1. Ni ba nde bavugwa muri uyu mugani?
2. Abana bagiye kuba he ababyeyi babo bamaze gupfa?
3. Batungwaga n'iki?
4. Impyisi yabigenje ite kugira ngo Nyanshya ayikingurire?
5. Iyi nkuru irangira ite?
6. Ni ibiki wungukiye mu kumva uyu mugani? Vuga nibura imigani ibiri y'imigenurano umaze kunguka.

Ibitabo n'inyandiko byifashishijwe

- Edition Bakame, (2007) *Igitabo cy'umunyeshuri, umwaka wa kabiri*. Kigali.
- Edition Bakame, (2007) *Igitabo cy'umunyeshuri, umwaka wa gatatu*. Kigali.
- Edition Bakame, (2010) *Ikinyarwanda, Ikbonezamvugo cy'amashuri abanza n'ayisumbuye*, Kigali.
- Institut de recherche scientifique et technologique (IRST), (2011). *Inkoranya y'Ikinyarwanda mu Kinyarwanda*, MAGANEM. Kigali.
- Karweit, N., & Wasik, B. (1996). *The effects of story reading programs on literacy and language development of disadvantaged pre-schoolers*. Journal of Education for Students Placed At-Risk 4:319-48
- Ikigo cy'igihugu gishinzwe integanyanyigisho, (2004), *Integanyanyigisho z'Ikinyarwanda mu mashuri abanza: Icyiciro cya mbere*. Kigali.
- MK. (2007), *Ikinyarwanda, Igitabo cy'umunyeshuri, umwaka wa kabiri*. Kigali.
- Ministère de l'Education Nationale, Direction Générales des Etudes et Recherches Pédagogiques, Bureau Pédagogique,(1977), Cours de Méthodologie Spéciale Kinyarwanda, Kigali.
- MK. (2007), *Ikinyarwanda, Igitabo cy'umunyeshuri, umwaka wa gatatu*. Kigali.
- Kagame F.,Zorzutti C.& Bonfils P.(2006). *Imigani y'ikinyarwanda. Proverbes rwandais. Proverbs from Rwanda*, Éditions Sépia.
- Ikigo cy'Ighugu gishinzwe Integanyanyigisho, (2009). *Gusoma, Kwandika no Kubara*, Igitabo cy'Umwigishwa. Kigali.
- Ikigo cy'Ighugu gishinzwe Integanyanyigisho,(2004). *Gusoma 2, Igitabo cy'umunyeshuri*. Kigali.
- Ikigo cy'Ighugu gishinzwe Integanyanyigisho,(2004). *Gusoma 3, Igitabo cy'umunyeshuri*. Kigali.
- Ikigo cy'Ighugu gishinzwe Integanyanyigisho,(2004). *Gusoma 4, Igitabo cy'umunyeshuri*. Kigali.
- Ikigo cy'Ighugu gishinzwe Integanyanyigisho,(2004). *Gusoma 5, Igitabo cy'umunyeshuri*. Kigali.
- Overdulve, C.M., Ireneee, J., (1998). *Twige Ikinyarwanda*, Manuel d'apprentissage de la langue rwandaise, 3e édition revisée et augmentée.
- UNICEF (n.d), *Children's Right and Responsibilities* <http://www.unicef.org.uk>

